

復懷想乃住正念，不得所思離邪正想，故曰正念。以除想諸等棄眾念，捨虛顛倒消想，不想等一切念，不猜諸念除諸想，故曰正念。

何謂正語，一切言辭皆為虛妄處在顛倒，悉皆惑想見於平等，心自念言，正斷一切言辭所宣，故曰正語。言無所湊無去無來，所見如是等無有異，已逮正語口之所宣皆實至誠，故曰正語。口言清淨，所住之處斷一切教言辭辯才，心中覺了口無所宣，悉捨邪言住於正語。

何謂正業，以住正業皆知一切眾邪之業，其一切業不真不諦，本無所作，所以者何，一切諸業無有至竟，業悉散，故曰正業。不於正不於邪，不於是不於非，無想不想皆度眾業，不造正邪等逮諸業無作非作，故曰正業。皆能等說邪正諸業，如真諦解一切諸業，亦真諦見無應不應，是謂正業。其以正行無有邪業，等見諦行，故曰正業。何謂正命，知一切命皆墮反邪，所以者何，其想有命想有萬物而懷妄想，無為泥洹清淨之想，及想見佛，一心清淨以住是中，欲以淨命皆墮邪業，一切諸命若正性命不以為邪，不以懷正命，是曰正命。解言是邪命逮一切命悉成清淨，是曰正命。解一切命無有正邪者，住淨命行無有放逸，無正邪命無雙無隻無應不應，是曰正命。無住邪者逮得淨命，無有命想無善無言無命不命，等行真正而見不虛，是曰正命。

真正，其不真正名邪方便，無方便矣，無究竟無言辭，斷諸方便，彼無所有，棄泥洹想，無佛法想，知行方便，一切方便，悉不真正，至無方便，其以平等則無方便，等一切法，無有若干，無有方便，超越方計，所有方義，則無所計，無應不應，是正方便，方便，得此之謂也。所言方便，是謂定意，斷諸方便，謂眾真諦，等見如是不想方便，以無所想，是正方便，何謂正意，一切所念皆為邪想，意之所念皆是邪思，所以者何，一切墮邪，彼若意生皆為邪，意無所念，所以者何，一切所念從因緣生，所曰因緣，皆曰邪矣，其意所念不起不滅，是曰正念，所以名正念，若無意念住處發起業，不意無意念第一淨，無邪意念，皆斷眾思，其以邪者悉無意念，是住正意，其正意者，不正不邪，正念邪念，除一切意，諸念思想，所曉了者，心不起亂，常行六事，曰住正意，意未曾生，有意未意相解，一切意皆了，諸意暢如真諦，不復思念，有意無意，應與不應，是住正意，無意無邪，念于等行，無念不念，無因無思，無所惟念，一切無望，逮致無言，無意不意，住思平等，無言無說，棄一切辭解，如真諦，普無宣教，無思無想，是乃名曰住于平等。

正定於一切定而無所著，則無放逸，明了如慧，曉達定意，不猜定行，而無希念等消正行，如以是者，無想不想，不想無想，乃曰正定，無正無邪，一切無望，以斷諸想，並滅眾希，乃曰正定。所云定者，無正邪定，心無所生，不正無邪，無正定無邪定，所以者何，以能覺解方便，諸定，乃住正定，無三昧想，不積平等，普曰一切，乃曰正定，其不馳騁不造等逸，若等若邪，普等諸法，一切定意，以存正受，一切三界，皆是有為，所思真諦，以慧覩見，一切五趣往來，所生，佛言持人，如是菩薩，曉了道義，以逮如斯，剖判道趣，若斯聖業，解暢真諦，乃曰正定。

持人菩薩經卷第二

持人菩薩經卷第四

西晉月氏三藏竺法護譯

世俗度世品第十

佛告持人菩薩，何謂菩薩得曉了知現世度世經典之要，云何名曰現世度世，若有菩薩常順思惟現世度世，云何順思，何謂現世法，何謂度世法，若有住於顛倒法行，皆從想有，由因緣生合於虛妄，有一緣立從二想生，一從虛妄，二從無生，其虛妄語，欺迷惑法，得愚冥想，猶如小兒，執若干種畫於虛空，虛妄經行，愚冥凡夫，想云有世，計其世俗，皆歸壞敗，麤散悉盡，以見一切世俗諸法，從虛欺惑，所因無作本無所生，陰種諸入，皆從緣對，色聲香味觸，由因緣法，不說色緣，猶愚凡夫，心有所

猗所以諸見因無數見而有猗著若彼種性  
 放存窮匱令世間見處在顛倒所覩世法度  
 世在彼為何所是世俗之法真諦如有達其  
 本淨是為度世明不求世了不可得度世亦然  
 若不能得現世度世無現世及度世業宣其  
 度世現世本淨何謂宣布度世之業若世本  
 淨至于度世所以者何永不可得現世本淨  
 悉空其世亦然本以自然世本淨寂以世自然  
 世淨寂然計世俗法無究竟成當作是觀現  
 世度世悉不可得不得度世不著於世不念  
 度世以不念世及度世者不與世諦所以者  
 何以覺曉了世間悉虛欺詐惑法以能覩見  
 世猗虛無不想於世不慕度世所以者何佛  
 言持人所云世者謂五盛陰也貪求合會一  
 切世法明知求陰永不可得五陰自然而不  
 可得五陰本淨亦不可得五陰無來去無所  
 至湊處不可得是曰度世不知五陰所歸處  
 所也以無五陰諸種本淨及諸衰入之本淨  
 也若有菩薩觀於世俗之法悉無所見以合  
 度世不見度世不與世合則無有世惟觀度  
 世在于度世不見世法而有異持也不轉二法  
 云是世俗是度世法所以者何持人其所在  
 世解世本末本無所有度世亦然雖見有世  
 悉無世法所作分別度世俱同以了無世假  
 使有人心自念言世俗別異度世不同則於  
 其人佛不興世雖佛出世普世顛倒無發道  
 行用真正解以慧察世頒宣經法處世顛倒  
 貪受于世而救濟之故曰度世也是故持人  
 用真正解以慧察之曉了世倒故曰度世也

如來出世普通諸法世俗度世皆無有二以  
 真正慧觀察造證故為宣布度世之法佛言  
 持人不以是法遊於世間無所至湊無所消  
 除不猗世諍乃得世義不念度世曉了世辭  
 達本所解以著想二不解能達如是像法則  
 無濟者不能解了不暢度世所以者何用二  
 行故其二行者不能解了世俗度世菩薩如  
 是方便曉了一切諸法現世度世靡所不達

持人菩薩經有為無為品第十一

佛告持人何謂菩薩曉了分別有為無為法  
 云何有為無為法若有菩薩以真正覺有為  
 無為順理求之云何順理云何求之亦不作  
 有為法有所見者自然得號已造有為故曰  
 有為又有為法以虛偽轉云何為轉由已合  
 會自然歸之以二緣立緣本際教用以所有  
 自因而生一切諸法無為作者勸使作者自  
 然生已是有為法斯自然法無有迴還故曰  
 有為其有為法無內無外亦無中間住存欺  
 惑無合無散由從虛妄思想興立從無明緣  
 生愚癡業有一切法自然轉行無教造行從  
 有為事受其相業因其顛倒以愚凡夫猗名  
 之故又明智者覺了有為不可得邊不猗有  
 為無合有法乃曰明智明智分別至實有所  
 造行滅一切為明智剖判一切諸行虛無欺  
 詐是諸法者悉無所有咸為自然亦無自然  
 從意念成一切有為所以者何不當奉行有  
 為因緣或曉無為未曾復習有為緣行若曉  
 無為爾乃通耳云何曉之一切有為皆為不  
 真而無有形悉無邊際無至合會明智觀之

不以有為至生究竟其有為者亦無所受悉  
 以無異有為無為亦復無異生宣斷有為業  
 是有為是無為斯有為相斯無為相彼何謂  
 有為相知生當死合會別離何謂無為相不  
 生不滅不會無別愚冥凡夫不能解了入斯  
 二義不曉有為所由起相及滅壞相不住異  
 相因無相生住於異也若無是相如來所說  
 從是相生從是相滅住如是相佛言持人如  
 來所云一切諸法皆無有相以能得成無所  
 生相無滅壞相無所住相如來敷演無為之  
 相是相非相其有為相不成無為導師所以  
 愚冥凡夫所宣道法有為所起會歸滅盡惟  
 無為安以能無為不生不滅亦無所住故曰  
 無為從其所習而令生滅其無所習則無究  
 盡無行無究無異住處其以真正解其斯慧  
 不致合會有起生而有滅也無有異住若  
 有菩薩當作是觀其有為法及無為法無有  
 不常見如應不覩有為及無為法有為不  
 見無為無為不見有為不見異無為而自謂  
 念我身有矣真有正是見有為業無餘有為  
 是諦有耳思念妄想其有為無為法永無所  
 想有為無為以無所想分別諸想皆斷諸著  
 以了無為除去眾緣本淨無緣其因本淨所  
 覩真正以能曉了悉無所作則無合會菩薩  
 能逮是有為無為則了諸法不有不無亦復  
 不猗有為無為乃逮正覺也

佛告持人若有菩薩分別五陰曉了諸種解  
 達六入以能暢知十二緣剖判四意止五根八  
 道能覺世俗度世之業明知有為無為之事

以曉了是，逮解一切諸法之無，宣布諸法，所不達得意力勢，解暢一切諸法章句，斷生老死心不能絕壞，能自究竟無上正真道成，最正覺。

持人菩薩經寶光菩薩品第十二

佛告持人，乃往過去無央數劫，不可稱計，懸曠無限，爾時於世有佛，號紫金山王如來，至真等正覺，明行成為善逝，世間解無上士道法，御天人師，為佛世尊，其紫金山王如來壽住五劫，諸聲聞眾不可計數，諸菩薩會亦不可限，無能稱了知其多少，其土熾盛，風雨時節，五穀豐熟，人民安寧，強不凌弱，各得其所，心行平等，飲食消化，不以為病，姪怒癡薄，善自修身，家居義教，順律清淨，彼時如來為諸菩薩一切眾生，決諸疑網，令無懷恨，頒宣菩薩道法之藏，時有菩薩名曰寶光，聞佛說是諸菩薩業，解陰衰入諸種十八十二緣起，諸根意止八正道行，世俗度世有為無為，即輒奉受，如是精進十二億歲，未曾發起姪怒癡心，不貪利養，飲食衣服床蓐，臥具病瘦醫藥，惟心精修，入如是像，曉了思惟，常修精進，盡其形壽，淨修梵行，在其佛所，壽終之後，還生本土，在於人間，適生墮地，便復出家，復受學斯，如是像法，曉了奉行，復在於彼六十億歲，淨修梵行，心不捨遠，如是像法，慕求不廢，復壽終竟，還生佛國，其紫金山王如來續存，復在其所，淨修梵行，一一劫中，五返生沒，終而復始，其紫金山王如來至真臨欲滅度，終五劫已，因是景模，博聞無量，曉了諸法，於五劫中所聞受，觀已從佛，諮講解者，逮其意力。

觀戴如來，便為眾生一一敷演，開發無量人，皆發無上正真道意，佛滅度後，正法住世，一劫，復五百返，往來周旋，生於人間，常出家學，奉是景模，曉了正典，化無央數，不可思議，眾生之類，皆入至行，寶光菩薩見萬億佛，最後有佛，名無量光如來，至真等正覺，所見授決，却無數劫，汝當成無上正真之道，過無數劫，當復逮見億百千姪，兆載諸佛，逮得正覺，號決一切議，如來至真等正覺，諸聲聞眾不可稱計，難可限量，諸菩薩眾無央數人，其國處世人壽二劫，米穀平賤，人民安隱，是故持人菩薩大士欲逮得是如斯景模，曉了正典，當精進學，受持諷誦，是經典要。

佛復告持人，若有菩薩學是經典，逮權方便，常修四法，何謂為四？一曰棄家捐業，行作沙門，二曰捨於憤鬧，習在閑居，三曰住清淨戒，行不違闕，四曰去離懈怠，精思不廢，是為四，以行是四，勤求博聞，常立忍辱，疾逮四法，何謂為四？一曰雖生天下，常住中國，二曰因值佛世，不在邊地，三曰常奉正法，終無相違，四曰悉除罪蓋，無復殃變，是為四，若有菩薩學如是像經典之要，輒逮力勢，布施清淨，戒禁無穢，忍辱精進，一心智慧，聖明無瑕，以建是法，致權方便，又復持人菩薩學斯立知止足，閑居功德，懷無蓋哀愍于眾生，以用大哀，入于眾生，然後乃學，如是像法，解了要行，又其菩薩入總持門，學於勤修，何謂得入總持門，而學勤修，志慕勤思，曉了量法，方便觀察，奉無限行，又解了觀諸定意門，諸要法門，入不可計，因緣。

正行，逮致如是比像力勢，曉一切法，分別諸法，得意力勢，以能曉了斷生老病死，志強無怯，不失正法，乃成無上正真道意，逮最正覺，佛復告持人，若有菩薩通總持門，普能曉了，一切諸法，言辭所趣，以用一事，入百千事，以用道力，分別諸法，無所不達，又若菩薩逮定意門，入音聲，便入無限定意門，辭以得入，是了若干品一切法門，以入一切諸法，道門，頒宣諸法，靡不蒙濟，又其菩薩奉行智慧，以是慧力，曉了諸想，勤解想已，以是慧力，逮一切法，疾通無礙，又若菩薩曉了無量定意門，行以住是地，普致一切十方法，又若菩薩曉了無量總持門，行解不可計定意門力，以定意門，暢不可限眾法之元，以是道地，普入諸法，靡所不通，又其菩薩甚能曉了觀世間行，極復分別有為無為，奉行諸法，心所不著有為無為，行如是像一切諸法，疾解諸法，逮得明慧，又菩薩行權方便，觀察一切諸法，本無所行，雖作是觀，不為世事，不著世法，亦無所矜，如是像法，疾得曉了一切諸法，分別諸法，意力，施財剖判章句，斷除生老死意，行具足，是故持人菩薩大士於是摸法而度無極，何謂為四？於斯法典，奉如道義，勤修正法，於斯經典，逮無罣礙，普入道慧。

持人菩薩經往古品第十三

佛告持人，乃往過去無央數劫，不可稱計，長遠無限，爾時有佛，號無量光超殊王如來，至真等正覺，明行成為善逝，世間解無上士道法，御天人師，佛世尊，其佛世時，聲聞眾不可

計數大會無限諸菩薩會不可稱載其佛在世時壽一劫又彼佛土皆以七寶而遍覆成七寶樹生周匝圍繞以用莊嚴一切諸樹殊異珍琦交露帳覆又諸樹下皆施師子床其諸床上細好帛氎裹樹布床一切諸床琉璃為足以赤真珠而按諸樹自然熏香合成諸葉華常茂盛而圍旋之其樹前自然浴池有八味水其水底沙悉以水精車渠赤真珠合成又以三寶造成浴池其諸浴池自生青蓮紅黃白蓮華又諸池水以七寶作技飾欄楯一切欄楯地平如掌又其佛土清淨無穢其佛國土寶樹熾盛猶切利天晝度大樹嚴飾巍巍明月珠樹諸億千種充滿佛土其光悉照覆日月耀令不復現其諸寶樹琦珍交露出好音聲哀鸞眾鳥天諸玉女歌音樂聲如是軟音普流佛土無三惡趣不犯諸惡不為眾生喧雜句說惟以敷演如斯像法智度無極是菩薩藏化無央數諸人物眾一日皆發道心其本發心志存大道便悉具足道品之法如是持人其無量光超殊王如來至真因其方便化不可計無央數載眾生發道心今生下方去此佛土在彼佛土成菩薩行佛滅度後正法存立竟至半劫時佛滅度後正法便沒有一菩薩名意無限從下方佛剎來生此土其國去斯十佛世界適生未久年十六歲便捨捐業行作沙門在無量光超殊王佛所諮受經典臨法沒時為諸菩薩宣布陰種一切諸入分別解義聞如是像精進之行在於斯法所度無極攝權方便因是德本彼土

復決見億數佛普蒙斯法所生之處常識宿命皆以幼童不娶妻室淨修梵行以家有信出為沙門所生之處逮得意力常所受身成就功勳而最後世逮得無上正真之道為最正覺號曰無量光珠王如來至真等正覺若有菩薩疾欲得成佛速一切智具足佛道在後五濁臨法欲沒當勤志成如是像法輒受宣布盡以愛樂常行精進最後末俗受是經典德勳無量諷誦奉行為他人說福不可喻

持人菩薩經毘陀和五百人品第十四

爾時毘陀和等五百菩薩橋曰兜菩薩即從坐起長跪叉手前白佛言我等世尊最後末世臨法滅時當受是法住於後世五濁之世擁護正典持是景摸諷誦奉持廣為人說復有無數諸菩薩等各從坐起長跪叉手諦視佛面各興至願我等世尊最後末世被弘誓鎧受是景摸順斯深妙佛所宣慧諸菩薩等所積德本道品之藏並使具足所在遊居當擁護法聞是經像益加喜樂受持諷誦宣示未達深入大猷時佛忻笑口中五色光出遍照三千大千佛土地六返震動賢者阿難即從坐起長跪叉手前白佛言佛何因笑既笑當有意光明普照地即大動佛告阿難汝寧見此諸菩薩眾住立我前在後末世當護正法被弘誓鎧以救危厄佛識念之往無數劫於諸佛所被如是像弘誓之鎧面從諸佛受斯經法持護三品開導無數眾生之類今是等來在於佛所承三品義受是正法今立佛前然後末世法臨沒時多所開化未達眾生

如令受佛三品正法在於賢劫諸佛興見亦當從受千佛訓誨三品正法又將來世諸佛聖所咸受亦然如是等阿難諸族姓子功勳名德不可得察莫能稱計所行經法是諸族姓子安隱眾生而供養佛假使如來班宣是等以受正道安隱眾生皆以不信若不信者長夜不安墮于惡趣又復阿難當為汝等現其證明如斯等類安隱眾生正使三千世界一切眾生皆由想行故墮地獄假使大眾在地獄中有一人生告地獄人無得恐怖當為汝等一一道利以時方便出大地獄苦惱之患則以己身一一濟之移著安處一人故無數千歲忍在地獄未曾懈廢普令致安阿難其人於眾生慈愍弘哀寧增多不出大地獄立大安隱阿難言甚多甚多天中天佛言假使彼人顯示神足如是巍巍令眾生類立第一最有為之安長樂無極成大哀愍皆逮覆護其功德福非心所思非言可暢佛告阿難今故語汝如彼菩薩於大地獄出無數眾立之永安所愍眾生若合集是前所安隱順和眾生使濟大難至有為安百倍千倍億萬倍巨億萬倍不如族姓子受是像經所以者何計其所興有為之安有極盡矣不至無為不離貪欲不致滅度逮神通正覺之業不成寂志泥洹之要又阿難是諸菩薩建立眾生無上大安一切智業又是菩薩以大士法志學道乘建立佛道度諸眾生立諸聲聞緣覺之地觀助佛法修菩薩行住于大道斯諸族姓子勸助眾生行菩薩法不料佛教諮啟大雄

①千種 ②養佛 ③料科

受立弘慈成一切智，故功無限。佛言阿難，由是正法若千劫中若無數劫，不可計限。億百載劫，懸邈如是。諸佛世尊常不空間，展轉相教，及餘無數億百千劫，轉復相度，使成佛而無窮。功故無限，所以者何？億千百佛本住宿世，行菩薩業，建立佛道，斯等之類，在在所生，受是經典，各用勸助，逮無上正真之道，成最正覺。將來之世，無數菩薩，多所開化，不可計眾。以是勸助，具足佛法，成無上正真之道也。如是阿難，諸族姓子，訓立眾生，一切智安無上大道，欲平等有法父母者，正當謂之諸佛菩薩。道法父母，今是菩薩擁護，自歸普得自立。是所謂安甃陀和橋曰兜等五百人等。

則法父母，斯諸菩薩護是正典。族姓子族姓女等，不違佛教，亦不絕一切智本。於將來世臨法欲沒，為諸眾生建立大護，住在大哀，開益一切。以是勸助，在於末世，而安護之不墮惡趣，令無數千億菩薩，若無數佛共嗟嘆，是族姓子等功勳之德，不能究竟。所以者何？是諸族姓名動至德，不可思議。

佛告阿難，佛無數劫億千兆載，合集積累，是正法寶。其受是法族姓子等，十方無數不可計會。諸佛世尊遊無限土，今現在者，咸共擁護。學是法者，皆令安隱。佛言阿難，天上世間，悉為是等諸族姓子。稽首敬禮，歸命諮受。十方諸佛，悉嗟嘆之。所演經法，以示不逮。阿難，佛以豫印，印是族姓子，決一切疑。若後末世，受如是像，無上正法，持誦說，宣布同學。是族姓子及族姓女，以為疾近一切智業。臨法

滅時，聞是景摸深妙經法，懷喜信者，佛以授決行菩薩乘。如是至真，最後末世，愛護是法，建立己身，而愛樂法。佛以勸助，是諸族姓子及族姓女，而不誹謗斯深妙法。佛預授決諸聲聞乘，見彌勒佛出現於世，諸漏已盡，無有愛欲，用受信是深妙法。故未曾誹謗，致是功報。佛言，若菩薩學聞是深法，信樂悅豫，亦皆授決。在於彌勒如來世時，出家學寂，而復誓願，乃有殊特。佛謂是族姓子女，德本調柔，功勳無際。臨法欲沒，最後末世，受斯深法，奉行精進，德不可量，巍巍如是。

#### 持人菩薩經囑累品第十五

爾時持人菩薩前白佛言，願佛建吾以轉法者，不求名利。最後末世，聞是正典，顯發忻悅，受微妙義。以是之故，疾解諸法，逮分別慧，速得意力。剖判諸法，曉了道慧。所生之處，識念不忘。以大法光照於十方。佛言，持人，若有菩薩，觀是法品，大智慧業，無極明本，積大功德，不可限量。若將來世，受是法品，持誦讀，及餘深經菩薩，篋藏，諸度無極，勤心奉行。魔事因緣，不能得便，不為罪蓋之所覆蔽。佛預授決，見兩三佛，輒當逮得無所從生法。忍，其得忍，者亦當得是無上道品。自解諸法，而得自在。嚴淨佛土，具足聲聞。受其道教，奉菩薩行。如是持人，佛下印封，斷一切疑。最後末世，現得四義自在之業。行菩薩大士法，受是經典，而擁護之。被弘誓鎧，何謂為四？一曰，受己德本，甚大無極，不可限量，不可計會。二曰，當為眾生顯發善元。三曰，諮受如來正法經要。四

曰，執持法藏，無央數佛所宣道化，是為四。復有四法，最後末世，將護深法，何謂為四？一曰，攝取精進，在弊惡世，受行正法。二曰，若在厄難，第一苦毒，諍亂正法，所持法品，人共鬪時，化令和合，擁護正法。三曰，行發忍辱，具足仁和。四曰，在於末世，心不懷恨，往來周旋，常行慈愍，是為四。得致深法，疾逮一切智。

爾時甃陀和橋曰兜五百菩薩，及餘菩薩，聞佛說是道品正法，咸住佛前，心自念言，於後末世，擁護正法。佛以右掌摩諸菩薩，而告之曰，諸族姓子，佛無數劫，而積習是無上正真道，成大寶藏，甚用勤苦，忍遭困厄，所濟無限，使得大安，捨身之安，而憂一切，乃致道法，成最正覺。以累仁等，若有學誦，逮是法者，廣為四輩，而敷演義。若三品法，欲毀壞時，當建立護。爾乃震揚無極大光，佛重累族姓子等，如來猶父，諸賢如子。佛猶國君，諸仁如臣。父慈子孝，君正臣忠。天下和平，吾無數劫，習是正法，道德寶藏，令普流布八極上下。諸天人民，一切慈孝，自歸命佛。佛以大哀，皆共蒙濟。爾時諸菩薩眾，從甃陀和橋曰兜等五百群眾，稽首佛足，前白佛言，承佛聖旨，任力盡意，將護末世佛所宣教，惟願如來，建立垂恩。最後末世，令斯正法，道寶之藏，使普流布八方。上下一切，皆蒙佛加威神，說是法品，有無央數，不可計會。諸菩薩眾，得一生補處，德本道慧，皆以備悉。無數億千諸天人民，皆發道心。佛悉授決，於將來世，皆得佛道，各有名號。佛說如是，持人菩薩，及一切菩薩，甃陀和橋曰兜

等五百群眾。四部眾會諸天人阿修羅。聞佛所說莫不歡喜。作禮而去。持人菩薩經卷第四

持世經卷第一

No. 482 [No. 481]

姚秦龜茲三藏鳩摩羅什譯

持世經初品第一

如是我聞。一時佛在王舍城迦蘭陀竹園。與大比丘僧俱。爾時世尊與若干百千萬眾。恭敬圍繞而為說法。會中有菩薩摩訶薩名曰持世。為諸菩薩摩訶薩無量功德莊嚴發心。欲善知一切法彼岸。欲善知發無量願具足無量莊嚴。欲通達無量諸法決定相。欲發無量莊嚴願深心。所行清淨。欲善知清淨具足布施。欲善知畢定清淨持戒。欲善知具足忍辱柔軟之心。欲善知清淨精進。欲善知清淨禪定。欲善知通達般若波羅蜜彼岸。以如是等無量功德故。從坐而起。偏袒右肩。合掌向佛。白佛言。世尊。我欲問佛。為利益安樂一切眾生。及諸菩薩摩訶薩。不斷佛種者。具足威儀。行處不著持戒。具足清淨戒受行大法。善知持無量行處道法。為是諸菩薩故。我今問佛世尊。云何菩薩摩訶薩能善知諸法實相。亦善分別一切法章句。云何菩薩摩訶薩能得念力。亦轉身成就不斷之念。乃至得阿耨多羅三藐三菩提。

則多所安隱眾生憐愍世間。利益安樂諸天人。亦為今世後世諸菩薩等作大光明。汝之功德不可限量。能問如來如是之事。汝必欲斷一切眾生之疑。愛護一切眾生為作光明。欲示眾生義利。欲令眾生得度嶮道。欲為眾生作歸作舍。作洲作救。欲拔三惡道眾生。欲置眾生於無上道。欲脫眾生老病死憂悲苦惱。欲與眾生無上涅槃之樂。汝欲於後世守護正法。於後恐怖惡世欲度眾生。持世。汝今善聽諦思念之。吾當為汝解說此事。唯然世尊。佛告持世。諸菩薩摩訶薩見四利故。勤修習諸法實相。亦善分別一切法章句。何等四。當得具足念。當得不斷念。當以安慧而自增長。念常在心。持世。是為諸菩薩摩訶薩見此四利故。勤修習諸法實相。亦善分別一切法章句。持世。諸菩薩摩訶薩復見四利。勤修習諸法實相。亦善分別一切法章句。何等四。當善知諸法義。當善知諸法義。當善知諸法種種因緣。當善入諸法如實門。是為四。持世。諸菩薩摩訶薩復見四利。勤修習諸法實相。亦善分別一切法章句。何等四。當善知無量法相。當修習善知決定無量法。當行無量功德而自增長。當知見諸法生滅相。是為四。持世。諸菩薩摩訶薩復見四利。勤修習諸法實相。亦善分別一切法章句。何等四。當近阿耨多羅三藐三菩提。當疾具足助菩提法。當不隨他語。善知諸法方便故。當善知一切智慧。持世。是為諸菩薩摩訶薩見四利故。勤修習諸法實相。亦善分別一切法章句。持

世。諸菩薩摩訶薩復有四法。勤修習諸法實相。亦善善分別一切法章句。何等四。為利益眾生故。心無慳垢。常行清淨戒安住毘梨耶波羅蜜故。發行精進不休不息。正思惟故。善行般若波羅蜜。是為四。持世。諸菩薩摩訶薩復有四法。勤修習諸法實相。亦善分別一切法章句。何等四。成就具足深心清淨之願。具足成就清淨所行功德。安住柔和忍辱功德。得分別諸法實相光明。是為四。持世。菩薩摩訶薩復有四法。勤修習諸法實相。亦善分別一切法章句。何等四。以大欲求一切智。善知分別禪定解脫諸三昧而生大欲。欲得大慈悲喜捨心故。方便行清淨行處。善修習決定義。是為四。持世。菩薩摩訶薩復有四法。勤修習諸法實相。亦善分別一切法章句。何等四。具足慧行。亦求清淨智行。處樂無礙智。亦常不離一切智慧之願。持世。是為菩薩摩訶薩有四法。勤修習諸法實相。亦善分別一切法章句。持世。菩薩摩訶薩見四利故。能求念力。何等四。當修集具足念根。當行安慧。當具足不斷念。當修集具足四念處。是為四。持世。菩薩摩訶薩復見四利。能求念力。何等四。具足諸助菩提法。故念常在心。以利念根善修集宿命。具足清淨智慧。故當疾得不斷念。當種一切智慧因緣。是為四。持世。菩薩摩訶薩復見四利。能求念力。何等四。當修集具足思惟方便。當修習如實智慧。當發勤精進得諸佛法故。當不忘憶念。得不斷念力故。持世。是為菩薩摩訶薩見四利故。能求念力。

①(一切...念力)十六字。諸法之相亦能得念力亦善分別一切法章句慧◎◎

持世菩薩摩訶薩有四法能得念力何等四念安慧故常勤精進不休不息常一其心得諸法實相故常不放逸正憶念諸法故常護諸根正思惟故是為四持世菩薩摩訶薩復有四法能得念力何等四安住清淨持戒成就清淨威儀行處除去心中五蓋不為世法所染離業障煩惱障是為四持世菩薩摩訶薩復有四法能得念力何等四以不散心求善法勤修習一心相善知正入諸法門不樂憒鬧遠離在家是為四持世菩薩摩訶薩復有四法名能得念力何等四親近善知識常修習深法常樂至諸佛菩薩所常樂請問修習智慧持世是為菩薩摩訶薩有四法名得念力

持世菩薩摩訶薩見四利能修習一切法分別章句慧何等四當善知一切諸法實相當知一切法所因當知諸法決定之義當善知一切法語言章句是為四持世菩薩摩訶薩見四法利能修集一切法分別章句慧何等四當善知諸法隨宜次第當善知一切法因緣方便當具足修集一切法方便當分別知了義未了義經是為四持世菩薩摩訶薩復見四法利能修集一切法分別章句慧何等四當善學是道是非道慧當得一切法義說力當疾得清淨智慧行處當具足修智波羅蜜持世是為菩薩摩訶薩見四法利能修集一切法分別章句慧持世菩薩摩訶薩復有四法能修集一切法分別章句慧何等四善知修集諸法集相善知諸法因滅相善知諸法緣相能入因緣方便是為四持世菩薩

摩訶薩復有四法能修集一切法分別章句慧何等四善知諸法苦善知諸法集善知諸法滅善知諸法滅道是為四持世菩薩摩訶薩復有四法能修集一切法分別章句慧何等四善知諸法合散方便得先因力善知諸法所宜善知分別文字章句是為四持世菩薩摩訶薩復有四法能修集一切法分別章句慧何等四善知不了義經於了義經中不隨他語善知一切法相印亦善安住一切法無相智中持世是為菩薩摩訶薩有四法能修集一切法分別章句慧

持世菩薩摩訶薩有四法轉身常得不斷念乃至得阿耨多羅三藐三菩提何等四明了善不善法成就第一念安慧能離五蓋心終不忘念阿耨多羅三藐三菩提心是為四持世菩薩摩訶薩復有四法轉身常得不斷念乃至得阿耨多羅三藐三菩提何等四善修集四念處善修集學分別慧於諸禪定智慧為首於決定智慧中得通達是為四持世菩薩摩訶薩復有四法轉身常得不斷念乃至得阿耨多羅三藐三菩提何等四得諸陀羅尼門亦修集無生智入於盡智亦觀於滅智是為四持世菩薩摩訶薩復有四法轉身常得不斷念乃至得阿耨多羅三藐三菩提何等四斷於愛恚不貪著一切有為法心通達無為智慧至如來所行處持世是為菩薩摩訶薩有四法轉身常得不斷念乃至得阿耨多羅三藐三菩提心持世菩薩摩訶薩有五淨智力能具足得如上功德何等五深心淨

智力願淨智力善根淨智力迴向淨智力障業淨智力是為五持世菩薩摩訶薩復有五淨智力皆具足能得如上功德何等五威儀行處淨智力念具足淨智力方便淨智力緣眾生淨智力緣相淨智力是為五持世菩薩摩訶薩復有五淨智力能具足得如上功德何等五捨心淨智力利益眾生淨智力生大慈淨智力生大悲淨智力生大喜大捨淨智力是為五持世菩薩摩訶薩復有五淨智力皆能具足得如上功德何等五持戒淨智力不著持戒淨智力忍辱淨智力不著忍辱淨智力多聞淨智力是為五持世菩薩摩訶薩復有五淨智力皆能具足得如上功德何等五深精進淨智力受精進淨智力禪定淨智力禪定方便淨智力止觀方便淨智力是為五持世菩薩摩訶薩復有五淨智力皆能具足得如上功德何等五慧淨智力多聞決定方便淨智力世間出世間淨智力慧方便淨智力有為無為淨智力是為五持世菩薩摩訶薩復有五淨智力皆能具足得如上功德何等五觀方便淨智力明解脫淨智力無生相淨智力一相無相淨智力第一義世諦義淨智力持世是為菩薩摩訶薩有是五淨智力疾得具足如是一切功德持世以是利故菩薩摩訶薩於是淨智力中應勤修集持世菩薩摩訶薩成就三法於是淨智力中能勤修集何等三一者欲二者精進三者不放逸菩薩摩訶薩成就此三法能於是具足一切功德淨智力中能勤修集何以故持世欲精

進不放逸。皆是一切法根本。菩薩摩訶薩得是淨智力。能疾得一切智。亦名精進不退者。亦名不退法者。亦以此功德疾得增長。亦於一切法中疾得淨智力。持世。若有人如是一切法中得淨智力者。是為世間福田。是人。我能消供養。是人。能至如來行處。是人。能觀如來法。是人。不久能證如來智慧。持世。我本無量阿僧祇劫行菩薩道。時然燈佛與我受記。汝過阿僧祇劫當得作佛。即時邊知。如是淨智力。持世。若有人於一切法中能成就如是淨智力者。是人。當得阿耨多羅三藐三菩提。如我今得。是人。亦轉法輪。如我今轉。是人。亦師子吼。如我今師子吼。是人。亦於一切法中得自在力。如我今也。持世。汝等於此淨智力中當勤精進。不久自然具足一切智慧。

持世。過去無量阿僧祇劫。有佛號智高王。如來應正遍知。明行足。善逝。世間解。無上士。調御丈夫。天人師。佛世尊。持世。是智高王。如來有無量聲聞僧。亦有無量諸菩薩僧。是佛本願因緣所致。是智高王。佛土無三惡道。其諸眾生不覺有苦。畢竟具足安隱快樂。離欲多者。能障五蓋。是諸眾生成就如是清淨快樂。如人入第四禪樂。是智高王。佛壽六百萬億那由他劫。持世。是時國土唯佛為王。更無有王。國土眾生皆號佛為法王。是智高王。佛多為諸菩薩。說是斷一切眾生疑喜。一切眾生心菩薩藏經。爾時有五百菩薩。聞是諸菩薩淨智力。發如是精進力。盡形不生坐心。盡形不生衣服想。盡形不生我想。眾生想。人想。男

女想。盡形終不多食。但修集如是淨智力。勤行精進。五百菩薩。以是善根。因緣。命終皆生過東方十萬億國土。既生不久。修集是法。故得識宿命。成就利根。其國土佛號無量花積王。現在說法。其諸菩薩始年十六。於無量花積王佛所出家。六十億歲。行童子梵行。亦修行如是精進。持世。是五百菩薩。得值如是等二十億佛。於諸佛所。勤行精進。成就第一念安慧。末後值無量力高王佛。與其授記。過萬劫。已當得阿耨多羅三藐三菩提。是五百人於萬劫中。得值二萬億佛。具足佛道。於一劫中。次第得阿耨多羅三藐三菩提。持世。當知菩薩摩訶薩。欲疾得阿耨多羅三藐三菩提者。於是淨智力中。應生欲精進不放逸。何以故。持世。諸佛阿耨多羅三藐三菩提。皆以欲精進不放逸為根本。及餘助道法。能具足佛法者。持世。我。以如是精進。得值二十億佛。於諸法中。世世成就念力。世世得識宿命。修集是法。不休不息。我終不失。是欲精進不放逸。我當成就欲精進不放逸。爾時世尊。以大慈悲心。顧視四方。現神通力。使三千大千世界諸閻浮提。皆有化佛。為諸眾生。說是斷一切眾生疑喜。一切眾生心菩薩藏經。復以神力。令竹園中。在會大眾。皆見諸佛。遍閻浮提。各說法。大眾咸悅。從坐而起。皆共禮佛。作是言。希有世尊。諸佛如來。神力不可思議。成就無量不可思議法。爾時佛告大眾。諸善男子。如來是事未足為難。所以者何。如來善能通達法性。故若一毛孔。出神通力。光明普照十

方。恒河沙世界。演說法音。於一毛孔。百千萬億分。未盡其一。如來成就如是不可思議功德。諸善男子。如來深觀眾生心。而為說法。諸善男子。今世眾生。少有於是法中能行欲樂。諸善男子。今世眾生。少有於是法中能行精進。諸善男子。今世眾生。少有於是法中能行不放逸。何以故。如來今出五濁惡世。所謂眾生濁。見濁。命濁。煩惱濁。劫濁。諸善男子。若有乃至一人。能信受如是甚深清淨法。能至佛慧。是為希有。何況能信解如來所行。諸善男子。我常長夜莊嚴如是願。如是精進忍辱。行。為苦惱眾生。無救護者。無依止者。多墮惡道者。我於爾時。當成佛道。利益無量阿僧祇眾生。諸善男子。當知如來恩力。本清淨。願精進。故。能令無量阿僧祇眾生。信解受持如是深法。諸善男子。我於先世教化眾生。是諸眾生能解我法。諸善男子。今佛以十力。四無所畏。少能令眾生信解如是甚深之法。若有眾生住是法中者。皆是如來恩力方便故。我長夜不離如是深法。我亦長夜大悲大喜。大捨攝取眾生。少有如來出五濁世。利益眾生。何以故。諸善男子。我於先世。以大精進力。大方便力。教化眾生。集是阿耨多羅三藐三菩提。諸善男子。我念過世一日之中。捨千身。布施利益眾生。諸善男子。我於若干千萬世。見飢餓憂悔。但於眾生。普行大悲。諸善男子。當知我如是以大精進。大方便力。教化眾生。集是阿耨多羅三藐三菩提。是故諸善男子。應發如是

①持人菩薩經1卷571中24:皆離貪欲除去五蓋。五蓋能蓋覆心性而不生善法。②離欲能遮五蓋故而能生善法。③及④⑤⑥⑦反⑧



欲精進不放逸，修集阿耨多羅三藐三菩提。如我行菩薩道時，汝等亦當如我利益教化眾生。諸善男子，是賢劫中諸佛出世，無不讚我。作如是言：釋迦牟尼佛深行精進，如是釋迦牟尼佛具足精進，如是釋迦牟尼佛具足精進，波羅蜜如是，釋迦牟尼佛行菩薩道時教化眾生，如是出於五濁利益無量阿僧祇眾生。諸善男子，如是行道，故應勤生欲精進，不放逸。諸善男子，我今雖得阿耨多羅三藐三菩提，精進猶不休息，至涅槃時猶發精進，碎身骨如芥子，解散支節，何以故？憐愍未來世眾生故。我先世行菩薩道時，所化眾生或行錯謬，墮諸難處，欲勉濟之，起大悲心，分布舍利，乃至如芥子，皆與神力。我滅度後，若有眾生，應以舍利度者，心得清淨，得清淨已，處處地中隨願成就。諸善男子，我先世行道時，於眾生中成就，如是悲心，碎身舍利，普使分布，是我本願。我，如是無量福德，因緣大悲心，故於後惡世，普覆眾生。諸善男子，若諸菩薩於此法中能生欲精進，不放逸，必發是願。於後末世，受持讀誦，為人廣說，如是等經，我當以神力，令諸菩薩受持讀誦，為人廣說。我亦以如是經，囑累是諸菩薩，以其能受持讀誦，為人廣說，故所以者何？諸善男子，隨是經所住，當知其土有佛不滅，是故如來以此經，囑累諸菩薩。諸善男子，當知我宿世，以如是因緣，攝取眾生。今世亦復攝取眾生，後世亦復攝取眾生。所謂護念，如是經法，於後五百歲，普流布故。諸善男子，若於今世，若我滅後，若聚

落城邑山林曠野，有如是等經，若能受持讀誦，為人解說，當知此中則為有佛。何以故？我說諸佛即是法身，以見法，故則為見佛。佛不應以色身見。若人信法聽法，是人則為信佛。亦聽佛語，若人於此法中能如說修行，是人則為見佛。是人名為實語者。法語者，隨法行者。諸善男子，我身非法，非非法，是名隨法行。是名第一法施。所謂不著法，不著非法，何以故？若著法者，不名見佛。諸善男子，不著一切法，名為見佛。若於一切法中無所見者，是名見佛。何以故？如來不可以法說，不可以非法說，亦不可以法見，所以者何？諸善男子，如經中說：汝等比丘，若知我法如椽喻者，法尚應捨，何況非法。若能捨法，非法是名見佛。何以故？如來名為捨一切法者，不貪不受諸法名字，不墮名字法中。何況墮非法名字中。諸善男子，捨離一切法，名字名為如來。能如是見者，名為見如來。何以故？捨離見一切法，故名為見如來。一切法不可得，故如實知見一切法，故名為見如來。諸善男子，若一切法不可得，捨離一切法，是中即無戲論。無是法，非法名字，無行無示，是名見如來。若人能如是見法者，是名見如來。若能如是見如來者，是名正見。若異見者，名為邪見。若邪見者，則為妄見。是人，不名為真見。諸善男子，真見者，斷一切語言道，非真非妄，非有非無，離一切法，不取一切法，不得一切法。如是見者，名為見如來。何以故？諸善男子，如來不以法性見。見一切法性，離者名為如來。若能如是見者，名為正見。諸善男子，汝

等應如是見如來。汝等且觀，如我所說，觀於如來，如是觀者，當知一切法皆是如來。當得一切法，如當得一切法，實相，當得一切法，非虛妄相。當知一切法是如來法。當知一切法是如來行處。當知一切法是不可思議行處。諸善男子，是故我說一切法是如來行處。如來行處是無行處。何以故？一切法行處，是中無法可行。是故說無行處是如來行處。一切法行處，即是無行處。無行處即是如來行處。何以故？一切法行處，無所有故。無行處是如來行處。一切法行處，無所有故。無行處是如來行處。如來通達證是法故，是名無行處。是如來行處。諸善男子，能知一切法無行處，是人能入如來行處。是人能觀如來行處。是人能求如來行處。是人亦不著如來行處。何以故？是人知無行處是如來行處。離行處是如來行處。所謂一切法不可得，不可分別，不可貪，故是名非行處。是如來行處。是名入智行處。不入一切法，故何以故？一切法無門，故以是門入。諸善男子，一切法無入無出，一切法無形，所以者何？如來於法無所得。何法若出，若入，若見，若說，諸善男子，是名入一切法門。以不入相，故一切法無合無散無縛無解。是一切法門。以無門，故說是門，名為不可出門，不可入門。不可歸門，不可說門。畢竟無生門。以是法門於法無所知無所見。以是法門於法無證無所入。何以故？諸善男子，一切法無門，門不可得。故虛空是一切法門。從本已來，性清淨，故無斷。是一切法門。斷無所有，故無邊。是一切

法門。邊不可得故。無量是一切法門。量不可得故。無際是一切法門。諸際無所有故。諸善男子。若有善男子善女人。能入是法門者。則入一切法門。則知一切法門。則說一切法門。

持世經五陰品第二之一

爾時佛告持世菩薩。持世。若菩薩摩訶薩。欲得一切法實相。若欲善分別一切法章句。若欲得念力。若欲轉身具足。得不斷念。乃至得阿耨多羅三藐三菩提者。當疾入如是法門。於是法門得智慧光明。何以故。於是法中。疾得具足故。又復持世。菩薩摩訶薩。勤修集如是法門。入是法方便門者。則能得分別陰方便。界方便。入方便。因緣生法方便。四念處方便。五根方便。八聖道分方便。世間出世間法方便。分別有為無為法方便。

持世。何謂菩薩分別五陰方便。菩薩摩訶薩。正觀五取陰。所謂無明陰。是五取陰。苦陰。是五取陰。癡陰。是五取陰。病陰。癱陰。如箭入身。陰。是五取陰。菩薩分別觀察。選擇色取陰。云何為分別觀察。選擇色取陰。是色取陰。從四大生。假名為色取陰。是色陰。無有自性。但以四大和合。假名為色陰。色陰。無有作者。無使作者。無作無起。無出名。為色陰。但以先業。因緣四大所攝。數名色陰。非陰。是色陰。譬如虛空。陰實無生相。若說虛空陰。是中無有法生。但有名字。故名為虛空陰。凡夫於此。無陰。陰相。以顛倒心。故無實實相。貪著我五陰。我所五陰。我色陰。我所色陰。如是貪著。是諸凡夫貪著色已。於色中。依止我。我所有色。受色取

色著色。依色。受行種種惡不善業。我等不應隨凡夫學。我等應勤修集助菩提法。今應正觀色陰。菩薩正觀色陰時。知同水沫聚。云何知同水沫聚。無聚是水沫聚。但從眾緣生。不可執捉。無有堅牢。水沫聚中。無有聚相。無聚是水沫聚。色陰亦如是。色陰中。無有陰相。菩薩如是觀時。作是念。凡夫不能正觀虛妄色。不能如實知色。無常。不能如實知色相。我等入正道。不應貪著虛妄。不應貪著色。何以故。色是不可貪著相。色。但有名字。無決定相。當觀是色。無決定相。離名字。故名之為色。又說。色名惱壞相。智者通達。知是無相。我等應當善知修集色。無相方便。不貪著色相。若人貪著色相。即貪著色。我等應善知入色相。菩薩如是正觀時。如實觀察。選擇色。是色陰。皆從凡夫憶想分別起。若法從憶想分別起。即是不生。一切憶想分別。皆非真實。凡夫依止顛倒所起色。為色所縛。為色所害。往來苦惱。無明癡闇。故貪色不捨。見色有常牢固。是凡夫人。深貪色味。不觀色中。有諸過惡。我等不應隨凡夫學。應當觀察。選擇分別修習色方便。分別觀察。選擇色時。見色性如夢。譬如夢中。色。皆從憶想分別覺觀起。曾所見聞。覺知因緣起。是夢中。亦知彼我。亦見地水火風。亦見山河叢林。夢中。色相。無有決定。但以憶想。故有色陰相。亦如是。從先世業。因緣出。無有決定性。菩薩如是思惟。不取色。若我若我所。但正觀色。如實無常。相虛妄顛倒。眾生顛倒貪

著取色。若我色。若我所色。若彼色。若彼所色。如是正觀察。選擇色時。不得色。不見色性。亦不貪著色。無常。菩薩爾時。若於色中。愛念貪著。皆悉除斷。善知色正相。善知色平等相。善知色滅相。善知色滅道相。善知色陰。無所從來。亦無所去。作是念。是身色陰。皆從業果報。覺觀起。四大所攝。是身色陰。非我非彼。無有所屬。無所從起。觀色陰如是。內色。不貪不受。外色。不貪不受。過去色。不貪不受。未來色。不貪不受。現在色。不貪不受。即知一切色陰。是無生相。是菩薩爾時。不滅色。亦不求滅色法。持世。菩薩摩訶薩。觀察。選擇色取陰。如是持世。何謂菩薩摩訶薩。觀察。選擇受取陰。菩薩作是思惟。是苦受。樂受。不苦不樂受。皆從因緣生。屬諸因緣。入受相中。此中。無有受者。但以貪著。故貪著者。即是不真。虛妄。從憶想分別起。是菩薩如是思惟時。作是念。是凡夫為虛妄受所縛。為三受所害。所謂苦樂不苦不樂受。是凡夫若受樂。為愛結所使。以愛結所使。故能起惡業。若受苦。為恚結所使。以恚結所使。故起諸惡業。若受不苦不樂受。為無明結所使。是人因無明結。所使。故不脫憂悲苦惱。我等。今不應隨凡夫學。應正觀諸法。我等。應如實觀諸受。菩薩如實觀受。陰。作是念。非陰。是受陰。從憶想分別起。顛倒相應。無有受者。但從先世業。因起。今世緣故。諸受。自性空。受中。無有受相。菩薩觀達受陰。譬如雨滄水泡。有生有滅。無有決定。受陰。亦如是。次第因緣起。屬諸因緣。無有住時。虛妄不實。從憶

~聞說此悲具足義者。心則迷悶。無所復樂。日連。且置如來大悲。若我具說為菩薩時。所有大悲。汝亦迷悶。無所復樂。

想顛倒相應起，菩薩爾時作是念：凡夫可愍，為諸受所制，以不正觀受陰故，故得樂受生著，得苦受亦生著，得不苦不樂受亦生著，為諸受所縛，馳走往來，從身至身受，結所縛，輪轉五道，無有休息，是凡夫著於諸受，為受所制，為受所繫，不脫受陰，於受陰所不見出處，不知正觀受陰故，不知如實觀受陰無常，於受陰中為欲染所縛，不知受陰如實相，我等今不應隨凡夫學，應如實觀察選擇受陰，即時如實觀受陰，無陰是受陰，不真陰是受陰，顛倒陰是受陰，不住陰是受陰，是時見受陰如實相，無有作者，無有使作者，於受陰中不見受陰相，如是觀受陰，不見受陰在內，不見受陰在外，不著受我，不著受彼，知受陰無所從來，無有所屬，無法能生受者，但從顛倒相應先世業果報數名受陰，見受陰虛妄，因緣相續行，爾時過去受陰不受不貪不著，未來受陰亦不受不貪不著，現在受陰亦不受不貪不著，是人於樂受中除却愛結，於苦受中除却悲結，不苦不樂受中知見無明結，故勤行精進，菩薩爾時若受樂受，心不生愛，若受苦受，心不生悲，若受不苦不樂受，心不生癡，持世：凡夫多於樂受生愛，苦受生悲，不苦不樂受生癡，是諸凡夫以愛悲癡故，深入闇冥，不能如實知受陰，亦不知愛悲癡相，深貪著愛悲癡，所謂是我我所，是此彼等，持世：菩薩摩訶薩於此中正觀受陰者，不為愛悲癡所牽，若生愛悲癡，即能除斷行於正道，於樂受中斷愛結，使故勤精進，於苦受中斷悲結，使

故勤精進，於不苦不樂受中斷癡結，使故勤精進，如實知三受相，爾時有所受，若苦若樂，若不苦不樂，皆離不著，離愛結，使離悲結，使離癡結，使諸受起時，皆能知見，知受陰如實無常，若能如是知已，於受陰中欲染悉斷，入斷受陰，欲染道中，不為諸受所污，是菩薩若如是正觀受陰，如實知受陰，知受陰集，受陰滅，受陰滅道，然後如實知受陰，是無生相，以無生相通達受陰，無相，持世：菩薩摩訶薩如是觀察選擇受陰，持世：何謂菩薩摩訶薩觀察選擇想陰，菩薩摩訶薩正觀想陰時，見想陰皆從顛倒起，虛妄不堅固，不真實，從本已來，不生相，以因緣和合，從先世業力起，作是念：非陰是想陰，虛妄陰是想陰，顛倒陰是想陰，想陰中無想陰想，譬如春後月焰，以名字故，說名為焰，隨想陰亦如是，以識相故，說名想陰，凡夫於此為虛妄想所繫，或識樂，或識苦，或識不苦不樂，或識寒熱，或識男女，或識五道生死，或識合，或識散，或識過去，或識未來，或識現在，或識好，或識醜，或識有，或識無，是凡夫想，皆為顛倒虛妄屬諸因緣，但假名為想陰，此中若內若外，無有想者，凡夫人虛妄想所繫故，或識貪欲，或識瞋恚，或識愚癡，或識妻子，凡夫依止是想陰，貪著虛妄，以是想陰馳走往來，不能如實觀想陰，是虛妄，凡夫人以我想，彼想，男女想，繫於想陰，不能得脫，貪著想陰，我是想陰，我所是想陰，我等不應隨凡夫學，菩薩摩訶薩如是正觀想陰，想陰中想陰想不可得，如焰陰中焰陰相不可

得，菩薩見想陰如焰性，過去想陰不貪不受，不著，未來想陰亦不貪不受不著，現在想陰不住，不分別，若我若彼，即彼滅想，受陰道，通達想陰，是無生，不見想陰若來處若去處，但以顛倒相應，先世業因所起，現在緣所繫，無陰是想陰，觀察選擇想陰，無所從來，亦無所去，即通達想陰，無生，亦不分別想陰滅，但為滅一切想，受陰故，亦住如實知見故，菩薩如實觀想陰時，遠離一切想道，心亦不住一切想道，但住知見想陰，亦如實想陰，不貪著想陰，如實觀察一切想陰，如實知想陰集滅盡，持世：菩薩摩訶薩如是正觀察選擇想陰，則離想陰欲染，亦能行斷想陰欲染道，持世：何謂菩薩摩訶薩觀察選擇行陰，持世：菩薩摩訶薩觀行陰從顛倒起，虛妄憶想分別，假借而有，菩薩爾時若身行口行意行，皆觀不淨，無常，苦，空，無我，如是觀時，作是念：非陰是行陰，苦陰是行陰，因緣生陰是行陰，像陰是行陰，諸行陰無增無減，無集，若身行口行意行，無有作者，智者不貪受是行陰，何以故，是諸身行，不在身內，不在身外，不在中間，口行意行亦如是，不在意內，不在意外，不在中間，行陰中無行陰相，何以故，是行陰從眾因緣顛倒起，虛妄不真，先業果報所攝，亦令因緣所繫，能有所行，諸所有行，若身行若口行若意行，皆非真行，是無所有行，是虛妄行，是顛倒行，是故說非陰是行陰，何以故，智者不決定得行陰相，是身行是口行是意行，此處彼處若內若外，又身口意行，尚無決定行

相可得可說，何況行陰可得可說，是故說無陰是行陰。凡夫起顛倒想，貪著身口意行，憶念分別是行陰。為行陰所縛，馳走往來，是凡夫人以顛倒故起身口意行，起已貪著歸趣，無法生法想，無陰生陰想，貪著顛倒行故，為行陰所繫往來五道，常隨身口意行，不能如實觀身口意行，不能如實觀行陰故，以身口意而起諸行，是諸凡夫著顛倒故，著不真法故，著虛妄故，數名行陰。持世菩薩於此中如是正觀諸行無有根本，羸劣無力以眾緣和合，可說行陰，是中無有真實行陰，無陰是行陰。從本已來不生是行陰，無性是行陰，諸行前際不可得，後際不可得，中際不可得，無有住時，諸行念念生滅，持世菩薩如是正觀行陰空不可得，不堅牢相乃至毫釐亦不可得，作是念，是諸凡夫為不堅牢法所繫，行陰所繫，貪著所縛，起身口意行，我是行我所是行，起如是業為行陰所縛，不知行陰性入無明癡冥，於諸行中生真實想，以顛倒故貪著受取行陰，是人貪著受取行陰故，或起樂行，或起苦行，或起不苦不樂行，是人起樂行已得樂身，起苦行已得苦身，起不苦不樂行已得不苦不樂身，是人得樂身已生愛，得苦身已生瞋，得不苦不樂身已生愚癡，是人以愛瞋癡故，不見諸行過惡，不能清淨身口意行，是人身口意行不清淨故，墮不清淨道中，所謂地獄畜生餓鬼，或時暫生天人中，貪著身口意行，深著行陰，菩薩摩訶薩應如是正觀，今我等不應隨凡夫學，我等應清淨身口意行，

不應貪著行陰，應觀行陰過惡，應求出行陰道，如是觀者名為如實正觀行陰，亦名正觀行陰無常，即時如實觀諸行，諸行集諸行滅，諸行滅道，不受不貪不著諸行，亦不貪不著行陰，如是觀時遠離行相，亦行無行陰道，即觀諸行空，於一切諸行中驚怖生厭離心，但起清淨身口意行，壞行相故離行陰相故，是人有所得身皆是清淨，何以故，是人身業清淨，口業清淨，意業清淨，身行清淨，口行清淨，意行清淨，是人遠離行陰相，壞諸法及根本相，如是正觀時，見行陰無所從來亦無所去，不得諸行決定生相，亦不得決定滅相，即觀諸行無生滅相，一切諸行亦無生滅，是人觀一切諸行無生滅，相生厭離心，正通達諸行集滅相，雖證諸行無生相而善通達諸行相，何以故，持世是行陰無決定相，譬如芭蕉堅牢相不可得，無堅牢相亦不可得，行陰亦如是堅牢相不可得，無堅牢相亦不可得，持世菩薩摩訶薩如是觀察選擇思惟入於行陰。

持世經卷第一

持世經卷第一

姚秦龜茲三藏鳩摩羅什譯

持世經五陰品第一之二

持世，何謂菩薩摩訶薩正觀察選擇識陰，菩薩摩訶薩觀非陰是識陰，顛倒陰是識陰，虛妄陰是識陰，何以故，持世，是識陰從顛倒起，虛妄緣所繫，從先業有，現在緣所繫，屬眾因

緣，虛妄無所有，憶想分別起，從識而生，有所識故名之為識，從憶想分別覺觀生，假借而有，有所識故數名為識，以識諸物故，以起心業故，以思惟故眾緣生相故，起種種思惟故，數名識陰，從有所識，有識像出，示心業故，攝思惟故數名識陰，或名為心，或名為意，或名為識，皆是意業分別故，識陰所攝，識相識行識性示故，數名識陰，如是非陰是識陰，不生不起不作，但以顛倒相應緣虛妄識故，數名識陰，何以故，是識陰從眾因緣生無自性，次第相續生，念念生滅，是識緣不生陰相，何以故，是識陰生相不可得，決定相亦不可得，生相不可得故，決定相不可得故，根本無所有故，自相無故，牢堅不可得故，智者正觀察選擇通達非陰是識陰，凡夫於非識陰生識陰想，以覺觀分別憶想顛倒相應虛妄所縛，強名為識陰，貪著是識陰，依止所識，依止識種種示思惟故生起識陰，是人種種分別貪著內識，貪著外識，貪著內外識，貪著遠識，貪著近識，以識相故分別起識陰，是人以憶想分別，若心若意若識，假借強名，是心是意是識，如是知種種心相生，是凡夫貪著識陰為識陰所縛，心意識合故起種種識陰，分別虛妄事故，以一相故，以決定相故，能得是心是意是識，能得分別愛著，是人依止識陰深貪識故，亦得過去識陰貪著念有，亦得未來識陰貪著念有，亦得現在識陰貪著念有，諸凡夫於見聞覺知法中，計得識陰貪著念有，是人貪著見聞覺知法，為識陰所縛，貴其所知，以

心意識合繫故馳走往來。所謂從此世至彼世。從彼世至此世。皆識陰所縛故。不能如實知識。識陰是虛妄不實顛倒相應。因見聞覺知法起。此中無有實識者。若不能如是實觀。或起善識。或起不善識。或起善不善識。是人常隨識行。不知識所生處。不知識如實相。持世。菩薩摩訶薩於此中。如是正觀知識陰。從虛妄識起。所謂見聞覺知法中眾因緣生。無法生法想。故貪著識陰。我等不應隨凡夫學。今我等當如實正觀察選擇識。如實正觀察選擇識陰。是諸菩薩如實觀時。知識陰虛妄不實。從本已來常不生相。知非陰是識陰。像陰是識陰。幻陰是識陰。譬如幻所化人。識不在內。亦不在外。亦不在中間。識性亦如是。如幻性虛妄緣生。從憶想分別起。無有實事。如機關木人。識亦如是。從顛倒起。虛妄因緣和合故有。如是觀時。知識皆無常。苦不淨。無我。知識相如幻。觀識性如幻。菩薩爾時作是念。世間甚為狂癡。所謂從憶想分別識起於世間。與心意識合。三界但皆是識。是心意識亦無形無方。不在法內。不在法外。凡夫為虛妄相應所縛。故於識陰中貪著。若我若我所。是人貪著識陰在內。貪著識陰在外。貪著識陰在內外。貪著識陰在彼我。是人貴此識陰為識陰所縛。受識陰味。說識陰相。所謂若心若意若識。隨味行。故貪受識陰。是人為識所縛。識陰合故。為心意識所牽。以心意識因緣力故。生是凡夫若起下思。得下身。若起上思。得上身。若起中思。得中身。是人隨心意識力

故生。依止諸入。貪著識陰。故不脫生。老病死憂悲苦惱。菩薩於此中。如實正觀。選擇識陰。如實正觀。識陰無常相。故過去識陰不貪。不著。不念。知非陰是識陰。未來世識陰亦不貪。不著。不念。知非陰是識陰。現在識陰亦不依止。如實知識陰無常相。如實知識陰生滅相。若如是思。惟正觀識陰。是名正觀入識陰道。所謂如實知識。如實知識集。如實知識滅。如實知識滅道。是人如實觀識陰集滅相。能壞識陰。能斷一切相。知識陰集滅相。亦通達識陰集滅相。菩薩爾時亦不生識陰。亦不滅識陰。是識陰從本已來無生。如是觀時。不分別識滅相。通達識陰無生相。何以故。持世。是識陰無生。無相無成。是識陰生性虛妄。故入在無生相中。持世。識陰終不有生成相。是識陰相從眾因緣生。持世。菩薩摩訶薩如是觀因緣法。非陰是識陰。觀察選擇信解證知。通達諸所有識。悉皆知實。菩薩知識陰實故。如是一切所緣。知皆破壞。持世。菩薩摩訶薩如是觀識陰。知是識陰無生者。無作者。無起者。無受者。無所受者。但以眾緣生眾緣合。故有緣見聞覺識法。故繫有。從本已來常畢竟空。如是觀識陰時。即知識陰是無作無起相。不貴不著。持世。菩薩摩訶薩如是正觀察選擇入識陰。若菩薩能如是方便入五陰。能如是方便正觀五陰。是名通達入五陰集滅道。皆能斷諸陰相。真知五陰方便。以是方便故。於五受陰中。不貪不著不縛不繫。如實知色無常相。是菩薩若於色有欲染。則能除斷。亦如實

知受想行識。亦如實知受想行識無常相。若於受想行識中有欲染。則能除斷。菩薩於五受陰中。除斷欲染。故隨順通達。決定五陰方便。如是觀時。能知五受陰細微生滅相。持世。何謂菩薩摩訶薩能觀察選擇五受陰細微生滅相。菩薩摩訶薩觀眾生初入胎。歌羅羅時。先五陰滅。即更有五陰生。從是已來。觀五陰生滅相。雖先識滅。亦知五陰非斷滅相。識雖依止歌羅羅。亦知五陰不至不常。如是觀初入胎。一念五受陰生滅相。從歌羅羅乃至出生。及後增長。乃至死時。觀此五受陰念生滅相。如是觀察選擇五受陰微細生滅相。持世。是五受陰微細生滅相者。所謂先五受陰滅。次第無物有至胎。識初合時。五陰即有生滅。因歌羅羅五受陰假名為人。所以者何。持世。識無所依。則不能住。識所依者。五受陰是持世。又無色界中。諸天五受陰微細生滅相。亦應如是知。持世。如是細微五受陰生滅相。辟支佛智慧所不能及。何況聲聞智慧。惟諸佛如來善知五受陰。從初入胎細微生滅相。及無色天諸陰。念念生滅。所謂一切智慧。出一切世間智慧。菩薩摩訶薩得無生法。忍至佛慧境界。是人雖如是觀察選擇五受陰細微相。從初入胎乃至無色天。亦不能究盡。如諸佛所知。持世。諸佛如來。無有隨他智慧。自然得一切智慧。方便得阿耨多羅三藐三菩提。諸佛智慧。無所不達。諸佛無礙智慧。於一切法中。得決定慧。於一切法中。得自在力。何以故。於無量無數千萬億阿僧祇劫。行於深法。故持

世一切凡夫不能如是方便觀五受陰。何況觀五受陰細微生滅相。何以故。諸凡夫人不能知五受陰如實。凡夫不知取不知受陰。

持世。何謂為取。取名我取。眾生取。見取。戒取。五陰取。十八性取。十二因緣取。是名為取。乃至所有法。若內若外。所謂欲取。有取。見聞覺識取。我我所取。持世。凡夫於此虛妄取。不知不見顛倒。因緣而取。諸法。是人為取所繫。無明因緣取。諸行。諸行因緣取。識。因緣取。名色。名色。麤相。眾生染著歸趣。所謂色取。色合。色縛。及取四無色陰。受想行識分別為名。持世。若無諸佛。眾生則無所知無所見。不能正觀五受陰。諸佛出於世間。壞眾生依止色。壞依止受想行識。壞和合一相故。諸佛如來作如是分別說。汝等所依所歸。是名為色。是色。但以四大和合。受想行識但有名字。名色相成就。故說五受陰。汝等眾生莫貪歸此。不牢堅五受陰。持世。如來何故說五受陰。持世。是凡夫人從顛倒生。入無明網。馳走往來。何所歸趣。貪受五受陰相。作是念。我依止此。當以得樂。是人以是樂想貪歸五陰。以苦想以不苦不樂想貪歸五陰。凡夫人所歸所依止處。是名五陰。持世。諸凡夫人從生以來。盲不知五陰。為是何等。不知五陰從何所來。不知五陰如實。故貪受五陰。是故說名受陰。於此中誰有受者。此中受者不可得。但以顛倒貪著分別虛妄自縛。無明癡闇故。取我取我所。取此彼。是故說受陰是五陰。無有取者亦無決定相。是故智者知非陰是五受陰。顛倒陰是

五受陰。無明陰是五受陰。凡夫於此為所繫縛。貪歸五取陰。以貪歸故。不知何等是取。何等是取陰。但為貪著所歸。五陰往來生死。貪著是五陰。故馳走諸趣。貪歸何等。貪歸見貪歸聞。貪歸覺貪歸識。貪歸愛貪歸無明。是諸凡夫為愛縛所縛。貪愛五受陰。為諸蓋所覆。入無明闇冥。不知不覺。我等今為貪歸何處。繫縛何處。以不知故。往來地獄畜生餓鬼人天道中。生死所縛。貪歸生死。不捨不捨不斷。五陰。亦不能知五陰如實相。不如實知。故為種種苦惱所害。墮虛空獄。不知出處。是人不見出道。故於無始生死道中。受諸生死。是故不能得脫。生老病死憂悲苦惱。亦不得度。無量生死險道。亦不得脫。諸大苦聚。還復歸趣於苦。貪著於苦。為苦所使。何等為苦。五受陰是。生時但苦生滅時但苦滅。持世。我。以是因緣。故為弟子說法。汝等比丘。當正觀色陰。亦當如實知色無常相。汝等若於色中有欲染者。當疾除斷。汝等當正觀受想行識。亦當如實知受想行識無常相。若於受想行識中有欲染者。當疾除斷。除斷欲染。故心得正解脫。持世。若有人知我所說法義。如是能如說修行。當得脫生老病死憂悲苦惱。若人不能如說修行。為色縛所縛。為愛繫所繫。入無明闇冥。貪取五陰。是人貪取五陰。故不能得脫。生死險道。持世。以是義故。我說世間與我諍。我不與世間諍。何等為世間。所謂貪著五受陰者。為世間所攝。是人貪歸五陰。為五陰所縛。不知五陰性。不知五陰空相。而與我諍。是人

違逆佛語。與佛共諍。故墮大衰惱。若有人於佛在世。若佛滅後。能如是觀虛妄五受陰。空無所有。從顛倒無明闇冥起。虛誑妄想。但誑凡夫。非五陰似五陰。如是之人。不與佛諍。不逆佛語。故得脫地獄畜生餓鬼苦惱。持世。諸佛不與人諍。斷一切諍訟。名之為佛。但為眾生演說實法。作是言。汝等先所取者。皆是顛倒。一切眾生顛倒力故。貪歸五陰。往來世間。是人貪歸五陰。已起種種邪見。貪歸種種名色。貪歸種種憂悲苦惱。是人為種種邪見煩惱。種種憂悲苦惱之所殘害。無有能為作救。作舍作歸。作趣。唯佛能救。凡夫小心小智慧。故貪嗜五欲。依止多過五陰。是凡夫人與救者。歸者。依者。脫一切苦惱者。而共諍訟。持世。我今舉手。其有見五陰者。見陰相者。貪五陰者。我則不與是人為師。是人亦非我弟子。不隨我出家。不隨我行。不歸依我。是人入於邪道。入虛妄道。取不實者。是為顛倒。不知佛意。不知佛隨宜說五陰。不知佛第一義。是人不受佛教。不應受供養而受。是人我尚不聽出家。何況當得受人供養。何以故。如是之人。是外道徒黨。所謂生五陰相者。貪著歸趣五陰者。持世。當來之世。後五百歲。法欲滅時。於我法中。出家多是生五陰相者。決定說五陰相深著五陰。入虛妄邪道。於我法中。而得出家。袈裟繞咽。常樂往來白衣居家。當知是人與外道無異。亦以我法多為眾人恭敬供養。持世。我說是見五陰者。決定說五陰者。貪著五陰者。不聽受人一椀之水。所以者何。是人於

我法中乃至無有柔順法忍是人違逆我法背捨聖行持世是故菩薩摩訶薩於後惡世應如是發大誓願於我如是甚深經典當共護持亦斷眾生五陰見故而為說法

持世我是經中說破一切陰相離貪著陰相爾時多有在家出家聞如是等經起於諍訟不生實相菩薩摩訶薩於此中應發大誓願我等於後惡世貪著五陰邪見眾生作大利益所謂度脫貪著見五陰眾生隨宜方便以法利益是故持世菩薩摩訶薩若欲得善知諸法實相亦善分別諸法章句欲得念力欲得轉身成就不斷念乃至得阿耨多羅三藐三菩提應常觀是五陰無常相苦相無我相虛妄相不堅牢相畢竟空相從本已來不生相常正觀時五受陰中所有欲染則能除斷亦得如是等深法中方便持世過去無量阿僧祇劫爾時有佛名大意山王如來應供正遍知明行足善逝世間解無上士調御丈夫天人師佛世尊持世是大意山王佛有八十億那由他聲聞眾皆是阿羅漢諸漏已盡及八十億那由他學地阿那含謂菩薩摩訶薩眾四十億那由他是大意山王佛壽八萬歲持世爾時有王名為德益是德益王有二萬大城具足豐樂人民充滿其城七重縱廣十二由旬四寶合成有七重塹皆有欄楯七重行樹諸寶羅網遍覆其上城塹諸樹及上羅網皆以黃金琉璃車渠馬瑙四寶合成一一大城各有五百園林皆有七寶衣樹充滿其中一一園林各有五百寶池八功德水皆滿

其中持世是德益王有八萬姝女其大夫人有二子一名無量意二名無量力持世是二王子各年十六夢中見佛端正無比如閻浮檀金幢見大歡喜覺已各說偈曰其一人言

我今夢見二足尊 金色百福相莊嚴  
成就無量諸功德 見已心得大歡喜

第二人言

我夢見佛明如日 端正姝妙第一尊  
猶如須彌眾山王 巍巍高顯見歡喜

持世即時無量意無量力二子詣父母所具說是事白父母言今我二人於夢中見佛惟願父母當聽我等俱詣佛所佛久出世我等放逸不能覺知沒五欲泥為色縛所縛為受想行識縛所縛我等在家以放逸故不能見佛持世是二王子為父母說是事已即詣大意山王佛所到已頭面禮佛足請佛及僧三月四事供養衣服飲食臥具醫藥於大城邊莊嚴德益王所遊園林懸繒幡蓋寶華覆地奉佛及僧令止其中其二王子三月之中以一切樂具供佛及僧供養已畢於佛法中俱共出家持世其大意山王佛知此二王子深心所願而為廣說是五陰十二入十八性菩薩方便經於四萬歲中終不睡眠常不滿腹食亦不傾臥若坐若經行又於四萬歲中不念餘事但念五受陰虛妄空相知是五受陰從顛倒起通達是五受陰相畢其年壽常修梵行命終即生兜率天上於佛滅後還生閻浮提大居士家至年十六復夢見佛為說五陰十八性菩薩從方便經聞是法已即覺驚

怖復於佛法滿萬歲中常修梵行亦復方便深觀五陰十二入十八性菩薩所行方便經命終生於忉利天上畢天之壽生閻浮提大姓婆羅門家大意山王佛法末後千歲之中其二人以本因緣故復得出家學問廣博其智如海亦善觀察選擇是五陰性入法如實通了於其世中教化二萬人及二十億天於阿耨多羅三藐三菩提持世是二菩薩從是已後世世同心共值十億那由他佛然後乃得無生法忍得法忍已復值一億那由他佛然後得阿耨多羅三藐三菩提二人共劫次第作佛一名無量音二名無量光持世是故菩薩摩訶薩若欲疾得阿耨多羅三藐三菩提當於是清淨無染法中勤行修集此陰入性及餘有為法中說實知見相

### 持世經十八性品第二

持世何謂菩薩摩訶薩善知十八性菩薩摩訶薩方便正觀十八性作是念眼性眼性中不可得是眼性無我無我所無常無堅自性空故眼性中眼性不可得故眼性虛妄無所有從憶想分別起眼性無有決定相虛空性是眼性譬如虛空無決定相無根本故眼性亦如是無決定相亦無根本故何以故眼性中實事不可得故眼性無處無方不在內不在外不在中間眼性無決定相以無事故眼性事不可得眾因緣生故眼性不過去未來不現在眼性眼相不可得眼性但以先業果報屬現在緣故數名眼性眼性者即是無性眼性中眼性不可得識行處故數名眼性

若眼根清淨。色在可見處。意根相應。以三事因緣合。說名為眼性。眼性中無決定眼性相。智者通達無眼性是眼性性。

持世菩薩摩訶薩若能如是觀察。選擇眼性。即通達無性是色性。何以故。色性中色性不可得。是色性不合不散。色無決定相。故說名色性。色無根本無分別。何況色性。色性則是亦無根本。色性不在色內。不在色外。不在中間。但以憶想分別。色在可見處。眼根清淨。以意識相應。見現在色。故數名色性。譬如鏡中面像。若鏡明淨。則生色相。鏡中色無決定相。鏡中無人而見色像。但以外有鏡內起色相。如是眼性清淨。所緣之色在可見處。如鏡中像數名色性。色無性相。無形性。無決定性。是名色性。諸色相無我故。數名色性。隨眾生所知。故說名色性。若菩薩知是色性。即知無性是色性。無生性是色性。無作性是色性。何以故。是色性不過去。不未來。不現在。示無所有性。示虛妄性。示假名性。名為色性。如是觀察。選擇色性。是菩薩正觀察。選擇眼識性。所謂眼識中無眼識。無眼識性。無有常性。眼識性無有根本。無決定法。眼識性無所示。是眼識性非合非散。無有根本。但以先業因緣起。屬現在緣繫色。緣故數名眼識性。隨凡夫顛倒心故。數名眼識性。賢聖通達眼識性。即是非性。何以故。眼識性無決定故。從眾因緣生。屬諸因緣故。數名眼識性。識所行處。是眼識性。是識無決定故。說無決定相。無生故。示虛妄故。能分別色相。故能示緣故。說是眼識性。隨

眾生所知。如來方便分別。破壞和合一相。故說是十八性。示識無決定相。但眼清淨能知色相。二法和合。故說眼識性。示眼識實相。故說眼識性。眼識性者。示眼所行處。能識色。是眼識性。即是說無性。何以故。智者眼識性中。求眼識性相不可得。眼識性中亦不得眼識性根本。所以者何。無決定性是眼識性。眼識性者。以假名說。所說性者。即是說不取義。能有所見處。是眼識意業起。是眼識相。故名。為眼識。眼性色性。眼識性。以是性門說。三事和合。以知諸緣相。故即是離諸性義。所謂是眼性。是色性是眼識性。有如是數。得令眾生入於實道。此中實無眼性。色性。眼識性。諸如來說。是知見諸性相。方便分別。說是諸性。若人通達是諸性。方便者。則知三性無性。何以故。諸性中無性相。故諸性中相不可得。故耳性。聲性。耳識性。鼻性。香性。鼻識性。舌性。味性。舌識性。身性。觸性。身識性。皆亦如是。

持世。何謂菩薩摩訶薩觀擇意性。菩薩作是念。意性無決定。根本無所有。故意性中無意性。無決定性。是意性。譬如諸種子種於大地。因於水潤。得日得風。漸漸芽出。芽不從種子出。種子亦不與芽和合。芽生則種子壞。種子不離芽芽不離種子。芽中無種子。意性亦如是。能起意業。故示意識。故如種示芽。得名意性。離意性則無意。意性不能知意。假名字故。說為意性。是意性不在意內。不在意外。不在中間。但以先業因緣。故起識。是意業。故知所緣。故諸性名字合。故現在緣起。故數名意性。

即是不決定意業相。即是眾緣和合相。亦說意性。從和合起。隨眾生所知。於第一義中無有意性。何以故。根本無所有。故無生。是意性。生無所有。故意性。即是世俗語。第一義中。決定無意性。過去未來現在不可得。智者通達無性是意性。諸菩薩觀擇法性。無性是法性。法性無自性。自性不可得。無決定性是法性。法性根本不可得。故決定事亦不可得。故。但為起顛倒眾生虛妄結縛。有所知。故說言法性。欲令眾生入無性。故說。是法性。何以故。法性中無法性相。是法性從眾緣生。眾緣生法。即無自性。諸因緣中無有自性。諸因緣皆從眾緣和合。顛倒故相續而生。如來於此。欲教化眾生。說是法性。以世俗語言。示無性法。是法性不在內。不在外。不在中間。但令眾生知見善不善法。以法性說。離一切法相。知見畢竟空相。故說畢竟空。即是法性。何以故。無所有。是法性。法性中無決定有相。譬如虛空無決定相。而數名虛空。法性亦如是。無決定相。破法相。故說名法性。法性即是無性。何以故。是法性不在過去。不在未來。不在現在。但屬眾緣。與緣合。故數名法性。說名法性。如眾生所知。故智者證知。無性是法性。法性非合非散。法性中無法性相。無多無少。以示性方便。故說法性名為性。若行者實通達。是法性相。即知見無性。是三界法性中無分別相。眾因緣和合。故分別諸法。故說是法性。示無決定性。是法性。智者非以法性相。故見法性。法性是無生相。何以故。法性中無有相。智者通達無

諸性皆業性和合而有。故虛妄不實。如同一事因不同人有不同見解。即依彼彼業不同故有異。三界皆業所成。故虛而不實。



相是法性。法性中無分別相。無相無分別。故說名法性。法性中無有住處。無處無起。無住無依止。是法性從本已來不生。故是法性無有生者。何以故。法性中無性。故又法性不以合故有。無合無散。無作無決定。名為法性。菩薩摩訶薩觀擇法性如是。所謂無性是法性。持世。何謂菩薩摩訶薩觀擇意識性。菩薩摩訶薩作是念。不生性是意識性。不決定性是意識性。意識性無根本。無有定法。以意識性示無性相。何以故。意識性中意識性不可得。是意識性虛妄。無所有。顛倒相應。以意為首。識諸法故名為意識。隨凡夫所行。故說意識性。賢聖觀知非性是意識性。虛妄無所有。是意識性。但示因緣法。故以意為首。故識諸緣合。故說為意識性。隨眾生所知。故如是說。智者知非性是意識性。從眾因緣生。憶想分別起。無有性相。即是第一義中無性相。義世俗法中為引導眾生。故說是意識性。欲令眾生知無性是意識性。但以小法壞離諸性。故說是意識性。何以故。聖人求之不可得。意識性不在意識性內。不在意識性外。不在中間。智者通達不合性是意識。意識不知意性。意性不知意識。但眾因緣生。從顛倒起。以意為首。知於諸緣。二事和合。故著虛妄。故從覺觀起。示眾生識相。故說名意識性。是意識不在過去。不在未來。不在現在。是意識無所從來。亦無所去。無有住處。從本已來不生。相。意識中無根本定法。何以故。是意識性相。即是無二相。即是無相。是相不以二相故有。無所示性

是意識性。智者通達意識性。是意識性不在一切法中。無處無方。不與法若合若散。聖人通達不生相。是意識性。是意識性無來無去。無緣。何以故。第一義中意識性無緣。不可得。不可示。故智者通達意識性。是不作是意識性。作者不可得。故無生是意識性。生相無所有。故持世。菩薩摩訶薩如是觀擇意識性。諸菩薩作是觀時。觀擇欲界色界無色界。皆是無生性。無所有性。云何為觀。所謂欲界中無欲界。色界中無色界。無色界中無無色界。以界示無界法。為取欲界相者。示是欲界。為取色界相者。示是色界。為取無色界相者。示是無色界。以界寄說無界。如智者所知。無所有界。是欲界。色界。無色界。智者不得欲界。色界。無色界。是三界皆無根本。無有定法。從眾緣起。是故智者知見無界。是三界。此中無有界相。是三界皆虛妄。合顛倒行。何以故。智者不得三界。不說三界。若過去若未來若現在。賢聖通達是三界虛妄。無所有。無自性。離諸法。但是顛倒起。為斷眾生顛倒。故知見三界。故如來分別說三界相。欲令眾生知無界。義故說三界非以性相。智者知見三界相。是無界相。持世。菩薩摩訶薩如是觀時。觀眾生性。我性。即是虛空性。無所有性。無生性。何以故。眾生性。我性。虛空性。無別無異。如是諸性。皆虛空出。但從眾緣生。故名之為性。此中決定無性相。何以故。虛空中無一定性相。是諸性相。皆入虛空。是無所有義。譬如虛空無性。是法畢竟離相。無所有相。一切諸性亦如是。離

性相。諸性中無性相。性相不在內不在外。不在中間。性中無有性。性中不攝性。性不依止性。一切性無所依止。一切性不生。智者於諸性中。不得生性。不得滅性。不得住性。一切諸性不生不起不住。從本已來不可得。智者不貪不著。諸性假名。不受不念。是故智者通達知見一切諸性。皆是無生相。若是無生相。即無有滅。第一義中一切諸性不可得。世俗法故分別說諸性。第一義中不說諸性。智者知見通達一切諸性。如第一義。持世。菩薩摩訶薩如是觀擇通達十八性及三界眾生性。我性。虛空性。諸菩薩如是觀擇通達時。不得性不見性。亦通達一切諸性假名字。亦信解諸入一切性是無性。亦知分別諸性。以世俗故分別說諸性。令一切諸性入第一義中。亦善通達無性方便。亦為眾生分別說諸性。亦令眾生善住諸性。以世俗語言為眾生說無性法。亦不以二相示諸性。雖知一切諸性無二。亦以方便說諸性。從因緣起。雖以世俗言說引導眾生。而示眾生第一義。雖善知分別諸性。而信解通達一切諸性無所有。何以故。持世。如來以第一義。故於性無所得。亦不得諸性相。持世。我於諸性無所斷。無所壞。得阿耨多羅三藐三菩提。何以故。第一義中無諸性。一切諸性無所有。無決定。一切性同虛空。一切性入虛空。一切性無生相。如來通達一切性。如是持世。如來不說諸性相。亦不說諸法。力勢。何以故。若法無所有。不應更說無所有性相。持世。如來亦說無所有性相。此中實無

所說性相持世是名善分別諸性菩薩摩訶薩得是善分別能知一切諸性假名能知世俗相能知第一義相能知諸性決定能知世諦能分別諸相能知隨宜能知諸相合能知諸相旨趣能知諸相所入能分別諸相能知諸相無性能令一切諸性同虛空性亦於諸性不作差別於諸性中不得差別不說差別亦為眾生善說破壞諸性持世譬如工幻師能示眾生種種幻事令知種種幻相若有知識親友語言是幻說幻實事是幻虛妄示顛倒眾生若有智者則知是幻持世世間性如幻諸菩薩摩訶薩入此幻法中知世間是幻性世間所行如幻是人以方便力示眾生世間如幻若有知此世間如實相為說世間虛妄如幻若有深智利根不開示之自能得知知諸法空如幻無實無有根本知一切法皆誑凡夫一切法皆繫虛妄緣中持世是故諸菩薩摩訶薩若欲入如是諸性方便於如是等深經無染無得說一切諸性知見相說一切諸性無文字無和合亦說諸性方便智慧亦說因緣所作旨趣亦說一切諸法如實相所謂世間出世間有為無為繫不繫善知方便旨趣說第一義世俗義了義經未了義經種種因緣解說於是甚深經中應勤精進

持世經卷第二

持世經卷第一

持世經十二入品第四

姚秦龜茲三藏鳩摩羅什譯

佛告持世何謂菩薩摩訶薩善知十二入菩薩摩訶薩正觀擇十二入時作是念眼中眼入不可得眼中眼入無決定又眼入根本不可得何以故眼入從眾緣生顛倒起以緣色故繫在於色二法合故有因色有眼入因色說眼入二法相依故說名眼色所謂眼色色是眼入門與緣故眼是色入門與見故是故說入以色緣故說眼入以眼見故說色入但以世諦故說其實眼不依色色不依眼眼不依眼色不依色但從眾緣起色作緣故說名眼入又從眾因緣起眼所知見相故說名色入云何為說隨世俗顛倒法故說第一義中眼入不可得色入不可得智者求諸入不見有實入但以凡夫顛倒相應以二相說是眼入是色入是眼入是色入即示虛妄入欲令眾生如實知諸法實相故說是諸入皆從眾因緣生顛倒相應行此中諸入實相不可得何以故若眼入若色入不在內不在外不在中間眼入色入亦非過去非未來非現在但現在因緣知色故說眼入如凡夫所行智者通達諸入皆是虛妄無所有從憶想顛倒分別起知見非入是入不說諸入性諸入無決定相但以眾因緣生故說如來說是諸入知見相所謂是諸入虛妄無所有屬諸因緣顛倒相應行諸入無有作者無使作者眼入不知不分別色入色入亦不知不分別眼入二俱離相若法離相此中不可分別說是入相皆從因緣生如凡夫顛倒如賢聖所通達是眼入色入無生無滅不來不去相眼不知眼

眼不分別眼色不知色色不分別色何以故二俱空故二皆離故眼不知眼性色亦不知色性眼色皆無性無法此中無一決定相眼不自作眼亦不自知色亦不自作色亦不自知二俱無所有故眼不作是念我是眼色亦不作是念我是色眼色性如幻性以虛妄假名故說是眼是色諸菩薩摩訶薩觀擇眼入色入如是耳聲鼻舌香味身觸亦如是持世何謂菩薩摩訶薩觀擇意入菩薩摩訶薩觀擇意入時作是念意入中意入不可得意無決定入相意入無根本何以故意入即是眾因緣生從顛倒起繫法入緣二法和合能有所作是意入因法入起因法入可分別說是二相依意是法入處意是法入門法入是意入門是故說名法入緣法入門故說是意入示意相門故說是法入以世諦故說其實意不依法法不依意因緣生故以諸法為緣故說意入因緣生故示意相故說法入隨世諦顛倒故說第一義中意入不可得法入亦不可得智者求諸入不見有實但凡夫顛倒相應以二相說是意入是法入是意入法入虛妄無所有如來如實通達故示是諸入如是諸入從因緣生顛倒相應行此中意入法入實不可得又意入法入不在內不在外不在中間又意入非過去非未來非現在但能覺現在因緣故說意入法入隨凡夫心故說智者通達是意入法入虛妄無所有從憶想顛倒分別起非入是入何以故諸入中無決定入相智者通達是諸入虛妄無所有意

入法入自性不可得，亦不得是意入法入所起實相，是意入法入但因緣生，如來說是諸入知見相，是諸入虛妄無所有，顛倒相應行屬諸因緣，意入法入無有作者，無使作者，意入不知不分別法入，法入亦不知不分別意入，何以故？二俱離故。若法離相，此中無可分別，是諸入皆從因緣生，隨凡夫顛倒心故說。如賢聖所通達，意入法入不生不滅不來不去，意入不知意不分別意，法入不知法不分別法，二俱空故。二俱離故意，不知意性法不能成意，不能壞意，法不能成法，不能壞法，二俱無所有，故意入不作是念，我是意入，法入不作是念，我是法入，是二俱空皆如幻相。

但假名字故分別說，菩薩摩訶薩觀擇意入法入如是，持世，何謂菩薩摩訶薩正觀擇內六入外六入，所謂是十二入皆虛妄，從眾緣生顛倒相應，以二相故有內外用，凡夫不聞真法，不知十二入如實相故，貪著眼入，我是眼入，我所是眼入，貪著色入，我是色入，我所是色入，耳聲鼻香舌味身觸意法亦如是，我是意入，我所是意入，我是法入，我所是法入，以貪著故為十二入所縛，馳走往來五道生死，不知出道，菩薩摩訶薩於此中正觀十二入時，見是十二入虛誑不牢堅，空如幻相，不貪著眼入若我若我所，乃至不貪著法入若我若我所，以不貪著故不憶念分別，菩薩如是善知十二入，持世，菩薩摩訶薩得如是諸入方便，於一切十二入中不繫不縛，亦證諸

入而能分別諸入，亦以眾緣生法通達十二入，亦以無相相壞十二入，亦不墮是諸入所依道中，亦知諸入性則是無性，亦知諸入方便究竟到邊，持世，譬如機關出水四面俱灑，十二入亦如是，內外因緣能有所作，此中實事不可得，是十二入先業機關所繫故能有所作，持世，所謂入者是諸凡夫，無知見者煩惱所入門，眼是色門，以生愛恚故，色是眼門，以生愛恚故，耳鼻舌身意是法門，以生愛恚故，法是意門，以生愛恚故，如是十二入與愛恚共合，故不知實相，持世，菩薩摩訶薩於此中善知諸入性，知是諸入實相，故不為愛恚所制，持世，菩薩摩訶薩善知諸入如是。

持世經十一因緣品第五

持世，何謂菩薩摩訶薩善觀擇十二因緣，菩薩摩訶薩觀擇十二因緣，所謂無有故說名無明，於無明中無法，故說名無明，不知明，故說名無明，云何不知明，不知無明，決定法不可得，是名無明，何以故，說無明因緣諸行，諸行無所有，而凡夫起作故，說無明因緣諸行，從行起故有識生，是故說諸行因緣識，從識生名色二相，是故說識因緣名色，從名色生六入，是故說名色因緣六入，從六入生觸，是故說六入因緣觸，從觸生受，是故說觸因緣受，從受生愛，是故說受因緣愛，從愛生取，是故說愛因緣取，從取生有，是故說取因緣有，從有生生，是故說有因緣生，從生有老死憂悲苦惱聚集，如是故說生因緣老死憂悲苦惱聚集，如是大苦惱聚於此中為集何法，但知

顛倒與明相違，無明聚為後身愛，依止喜染求處處生，則是愛集，持世，世間如是，為十二因緣所繫縛，盲無眼故，入無明網墮黑闇中，無明為首故，具足起十二因緣，諸菩薩如是思惟，觀無明實相，知無明空，故本際不可得，何以故，無明無故本際無，智者觀非際是本際，則不分別本際，斷憶想分別，故不貪著無明，知一切法無所有，是法不爾，如所說，若說一切法無所有，即是說知見不明，能通達一切法無所有，是為即得明，於此中更無餘明，但知見無明是名為明，云何為知見無明，所謂一切法無所有，一切法無所得，一切法虛妄顛倒，一切法不爾，如所說，是名知見無明，知見無明即為是明，何以故，明無所有，故無明因緣諸行者，諸法無所有，凡夫入無明闇冥中，狂惑作諸行業，是行業無形無處，是無明不能生行業，無法而起作故，說無明因緣諸行業，諸行業無有聚集，若是處若彼處來諸行業，亦非過去亦非未來亦非現在，無明無明性空，行業行業性空，諸行業無所依，但依無明起諸行業，諸行業不依無明，無明不依行業，無明不知無明，行業不知行業，如是無明諸行業，以顛倒故從無明生，此中不得無明，不得諸行業，不得無明性，不得諸行業性，但以闇冥數名闇冥，以是無明闇冥故，分別說行業，從無所有法而起作故，無明行業皆無所有，行業因緣識者，識不依行業，亦不離行業生，識行業亦不生識，何以故，行業不知行業，行業亦無持來者，但顛倒眾生從行業生識，是識

不在行業內不在行業外亦不在中間是識無有生者亦無使生者但緣行業相續不斷故有識生智者求識相不可得亦不得識生識亦不知識識亦不見識識不依識識因緣名色者名色不依識亦不離識生名色是名色亦不從識中來但緣識故凡夫闇冥貪著名色識亦不至名色智者於此求名色不可得不可見是名色無形無方從憶想分別起是名色相識因緣故有識性尚不可得何況從識緣生名色若決定得是名色性者無有是處名色因緣六入者是六入因名色起名色在身中故有出入息利益身及心心數法是六入皆虛誑無所有從分別起有顛倒用

六入因緣觸者是觸依色而有觸不觸色何以故色無所知與草木瓦石無異但從六入起故分別說觸何以故六入尚虛妄無所有何況從六入生觸觸空無所有從憶想顛倒起是觸無方無處觸空以無觸性故觸不知六入六入亦不知觸

觸因緣受者是受不在觸內不在觸外不在中間是觸亦不餘處持受來而從觸起受是觸尚虛妄無所有何況從觸生受諸受無一決定相諸受皆無所有從顛倒起有顛倒用受因緣愛者是受不於餘處持愛來受亦不與愛合受亦不知愛不分別愛愛亦不知愛不分別愛愛不與受合是愛亦不依受亦不離受有愛受中尚無受相何況受因緣生愛愛不在受內不在受外不在中間愛亦不在愛內亦不在愛外亦不在中間愛中愛相不

可得是愛但從虛妄想顛倒相應故名為愛是愛非過去未來現在是愛非以縛相故起是愛亦非縛相但以因緣相續不斷故說受因緣愛智者知見是愛無處無方空無牢堅虛妄無所有愛因緣取者愛不於餘處持取來愛不與取合愛亦不能生取有愛故說名取隨因緣和合故說取不與愛合亦不散愛不與取合亦不散取不在愛內不在愛外亦不在中間愛尚無有何況愛因緣生取諸取決定相不可得智者知見是取虛妄無所有取中無取相是取非過去未來現在取不在取內不在取外不在中間是取但從顛倒起因本緣生今眾緣故有取無有法若合若散是取無有根本無一定法可得凡夫受是虛妄取是諸行皆虛妄故世間為取所繫縛智者通達是取虛妄空無牢堅無有根本無一定法可得取因緣有者是取不持有來是取不能生有而說取因緣有是有不在取內不在取外不在中間有不依止取取不與有合亦不散但以眾緣和合故說取因緣有取不能生有取不分別有取尚虛妄無所有何況從取因緣生有有無有持來者有中不可得有不在內有不在外有不在中間是有非過去未來現在智者通達是有虛妄顛倒相應無合無散有無所知無所分別是有無處無方是有無前際無後際無中際是有非有故非無故但隨順十二因緣故說是有智者通達有相空無牢堅有因緣生者是有不持生來生亦不與有合亦不散是生不在有

內不在有外不在中間有不能生生亦不離有有生但示十二因緣相續說有因緣生有與生非緣非不緣有尚不可得何況從有生智者通達是生不依於有生生中無生相生中無自性生中無根本無一定法可得智者通達是生無性無所有但示十二因緣和合相續故說有因緣生生無有法若合若散生不在有內不在有外亦不在中間是生非過去非未來非現在是生前際後際中際不可得是生根本不可得智者通達從眾因緣生顛倒相應虛妄無所有如幻化相生因緣老死憂悲苦惱者是生不持老死憂悲苦惱來生亦不能生老死憂悲苦惱老死憂悲苦惱不在生內不在生外不在中間老死憂悲苦惱亦不依生以生故老死憂悲苦惱可說但示眾因緣生法故生不與老死憂悲苦惱合亦不散生中生尚不可得何況生因緣老死苦惱老死苦惱中老死苦惱不可得何以故老死苦惱不在老死苦惱內亦不在外亦不在中間老死苦惱非過去非未來非現在老死苦惱不與老死合亦不散但顛倒相應眾緣和合具足十二因緣故說生因緣老死苦惱老死苦惱無所依止老死苦惱決定相不可得老死苦惱前際後際中際不可得智者通達老死苦惱虛妄無所有顛倒相應無有根本不作不起不生如是觀十二因緣法不見因緣法若過去若未來若現在亦不見因緣相但知因緣是無緣無生無相無作無起無根本從本已來一切法無所有故通

達是十二因緣亦見是十二因緣無有作者受者若法所從因生是因無故是法亦無菩薩隨無明義故一切法不可得入如是觀中無緣即是十二因緣此中無所生菩薩觀十

二因緣是虛妄生隨順無明義通達十二因緣若法無者是法亦無是故說隨順無明義通達十二因緣無明是不生不作不起無根本無一定法無緣無所有菩薩爾時不分別是明是無明無明實相即是明因無明故一切法無所有一切法無緣無憶想分別是故隨順無明義通達十二因緣持世是名菩薩摩訶薩十二因緣方便智慧若菩薩能如是通達十二因緣合散是名菩薩善得無生智慧何以故以生滅觀則不能善知十二因緣若觀十二因緣集散是名得無生智慧若得無生智慧是名通達十二因緣持世是故菩薩摩訶薩欲入通達欲證無生智慧應當如是勤行修集是十二因緣智慧則能觀證十二因緣無生相持世若菩薩摩訶薩知無生即是十二因緣者即能得如是十二因緣方便是人以無生相知見三界疾得無生法忍當知是菩薩於諸現在佛得近受阿耨多羅三藐三菩提記是菩薩不久當得受記次第受記持世如是善人因與受記得安隱心於一切法旨趣方便中得智慧光明是人通達十二因緣是無生是人得近現在諸佛是人於諸惡魔無所怖畏是人度生死流得到陸地是人得度無明淤泥是人得到安隱之處持世若我今世若我滅後若聞若信若讀誦

若修習是十二因緣方便者我與是人授記不久當得無生法忍我亦記是人不久當於現在諸佛所得受阿耨多羅三藐三菩提記

### 持世經四念處品第六

佛告持世何謂菩薩摩訶薩善知四念處菩薩摩訶薩觀擇四念處順身觀身順受觀受順心觀心順法觀法何謂為順身觀身順受心法觀受心法持世菩薩摩訶薩順身觀身時如實觀身相所謂是身無常苦如病如瘡苦惱憂衰動壞之相是身不淨惡露可惡種種充滿其內九瘡孔中常流臭穢身之不淨猶如行廁如是正觀身時不得是身一毫清淨無不可惡者知是身骨幹筋纏皮肉所裹從本業因緣果報所起集取所縛何等為集何等為取從先因緣起是身是名為取今以沐浴飲食衣被床臥被褥醫藥是名為集如是現在因緣為集取所縛本業果報力故有用又是身四大所造無決定實色陰所攝數名為身何故說名為身能有所作故說名為身貪著依止處故說名為身隨意有用故說名為身從憶想分別起故說名為身假合作故說名為身與業合故說名為身是身不久終歸壞敗無常無定變異之相是身不在身內不在身外不在中間是身不知身亦不見身是身無作無動無有願求亦無有心與草木瓦石等無有異身中無有決定身相如是正觀擇身知是無有作者亦無使作者是身無前際無後際無中際是身無一常定堅牢之相如水沫聚不可撮摩是身八萬虫之所

住處是身百種諸病之所侵惱以三苦故是身為苦無有救者所謂行苦壞苦苦苦是身眾苦之器如是正觀身時又復思惟是身非我非彼不得自在不得隨意作是不作是身身無根本無一定法可得是身性空無一決定相是身虛妄所起繫於機關作法從本業因緣起不應於身中生我我所想我等不應惜身壽命菩薩如是觀時不得身若合若散不見有所從來去有所至有所住處不分別是身若過去若未來若現在則不依止身命不貪惜身若我若我所常離身受是菩薩觀身空無我無我所是身中我我所不可得故是身相不可得是菩薩若不得身相即不願身入身不起作道云何為入是身無有作者無有起者是身不作不起相從眾因緣生是因緣能和合身而是因緣亦虛誑無所有顛倒相應空無牢堅亦以是因緣故是身得生是因緣亦無生無相如是觀身即入身無生相中入已觀身無相以無相相觀身知是身無相相不可得故無生是身過去相未來相現在相不可得何以故是身無根本無一定法可得是身若此若彼不可得如是觀時知身無所從來亦無所去即入身不生不滅道持世菩薩摩訶薩如是循身觀身入如實相於身欲染則能除斷疾令其念正住身中是名順身觀身持世何謂菩薩摩訶薩順受觀受菩薩摩訶薩觀苦受樂受不苦不樂受見是三受無所從來亦無所去但虛妄緣合本業果報所持顛倒相應知諸受虛妄從憶想分別

起菩薩如是觀諸受不得過去受不得未來受不得現在受是菩薩見過去諸受空無我無我所無常無牢堅無不變異相如是觀是過去諸受空相寂滅相無相觀未來諸受空無我無我所無常無牢堅無不變異相觀未來諸受空相寂滅相無相是菩薩如是觀時作是念諸受無決定相無有根本無一定法不相似故新新生滅無有住時菩薩作是念是諸受無作亦無作者但凡夫顛倒相應心中起三種受屬本業因今世緣合故有是諸受是諸受皆空無有牢固虛妄之法猶如空拳如是觀受心住一處菩薩爾時得通達諸受集沒滅相見諸受不合不散又受中不見受作是念諸受空性空故即通達諸受無生相此諸受無生無滅無有成相是諸受皆無相無成相如是思惟受諸受時皆能不著如實知見諸受相離諸所受於此諸受亦無所依於諸受中心皆放捨則疾得捨三昧持世菩薩摩訶薩如是順受觀受

持世何謂菩薩摩訶薩順心觀心菩薩摩訶薩觀心生滅住異相如是觀時作是念是心無所從來亦無所去但識緣相故生無有根本無一定法可得是心無來無去無住異可得是心非過去未來現在是心識緣故從憶念起是心不在內不在外不在中間是心無一生相是心無性無定無有生者無使生者起雜業故說名為心能識雜緣故說名為心念念生滅相續不斷故說名為心但令眾生通達心緣相故心中無心相是心從本已來不生

不起性常清淨客塵煩惱染故有分別心不知心亦不見心何以故是心空性自空故根本無所有故是心無一定法定法不可得故是心無法若合若散是心前際不可得後際不可得中際不可得是心無形無能見者心不自見不知自性但凡夫顛倒相應以虛妄緣識相故起是心空無我無我所無常無牢無堅無不變異相如是思惟得順心念處是人爾時不分別是心是非心但善知心無生相通達是心無生性何以故心無決定性亦無決定相智者通達是心無生無相爾時如實觀心生集沒滅相如是觀時不得心若集相若滅相不復分別心滅不滅而能得心真清淨相菩薩以是清淨心客塵所不能惱何以故菩薩見知心清淨相亦知眾生心清淨相作是念心垢故眾生垢心淨故眾生淨如是思惟時不得心垢相不得心淨相但知是心常清淨相持世菩薩摩訶薩如是順心觀心

持世何謂菩薩摩訶薩順法觀法菩薩觀一切法不見內不見外不見中間亦不得諸法若過去若未來若現在但知諸法從眾緣生顛倒起諸法無有決定相所謂是諸法屬是人諸法本體於諸法中無諸法諸法不在諸法內不在諸法外不在中間諸法不與諸法合亦不散一切法無根本無一定相諸法無所有故不動不作一切法如虛空無所有故一切法虛誑如幻幻相無所有故一切法常淨相俱不污故一切法是不受相諸受無所有故一切法如夢夢性無所有故一切法無

形形無所有故一切法如像性常無故一切法無名無相名相無所有故一切法如響虛妄所作無所有故一切法無性性不可得故一切法如焰知無所有故菩薩如是觀一切法時不見諸法若一相若異相亦不見法與法若合若散亦不見法依止於法如是觀時見一切法無所從來亦不見一切法住處何以故一切法無住無依無起一切法無住處住處無所有故住處不可得故持世諸法無有差別一切法無分別相從眾生顛倒故有用是諸法無處無方智者得諸法非一相非二相非異相何以故持世一切法不生不起無能作者一切法離根本一切法無自性過諸性故一切法無歸處諸歸處無所有故如是觀諸法善知諸法無我無人觀擇諸法性空是諸法皆空性自空故諸法無相不見相故於諸法中不起願即時觀擇一切法無生作是念此中實無有法若生若滅如是觀時心住一處爾時便得通達一切法無生亦知見一切法集盡滅亦能入一切法離相離性何以故持世一切法無決定性智者通達諸法無相離相持世菩薩摩訶薩順法觀法如是觀者於法無所得無所受於法不為生不為住不為滅故行而見一切法盡滅相寂滅相持世是名菩薩摩訶薩善觀四念處何故說名念處念處者即是一切法無處無起處無所有處能如是入一切法則念不亂名為念處又念處是一切法不住不生不取如實知見處名為念處

持世經五根品第七

持世。何謂菩薩摩訶薩善知諸根。菩薩摩訶薩正觀出世間五根。何等五。所謂信根。精進根。念根。定根。慧根。菩薩修習五根時。信一切法皆從眾因緣生。顛倒所起虛妄緣合。似如火輪又如夢性。信一切法無常苦不淨無我。如病如瘡無有堅牢。虛偽不實敗壞之相。又信一切法虛妄無所有。猶如空拳如虹雜色。誑於小兒。憶想分別假借而有。無有本體無一定法。又信一切法非過去非未來非現在。信一切法無所從來亦無所去。信一切法空無相無作。信一切法無生無作無起無相離諸相。而信持戒清淨。禪定清淨。智慧清淨。解脫清淨。解脫知見清淨。菩薩如是成就信根。得不退轉。以信為首故。能信持戒。是信常不退不失。成就不退法。安住不動。信中常隨業果報成就信人。斷一切邪見。不離法。求師但以諸佛為師。常隨諸法實相。知僧行正道。住清淨戒成就忍辱。得如是不動不壞信。增上信故名為成就信根。

一切法故發行精進。於精進中不隨他人。於精進中得智慧。明成不退相。能得如是不退精進。增上精進。故得名成就精進根。

持世。何謂菩薩摩訶薩能得念根。善修習念根。菩薩摩訶薩常攝念一處。布施柔和具足。梵行。持畢竟清淨戒。眾定。眾慧。眾解脫。眾解脫。知見眾。常思念淨身口意業。常思念究竟其事。常思念一切法生滅住異相。方便常思念。知見苦集滅道諦。常思念諸根力覺道禪定解脫諸三昧方便。常思念一切法不生不滅。不作不起不可說相。常思念欲得無生智慧。常思念欲得具足佛法。常思念不使聲聞辟支佛法入心。常思念無礙智慧。常不忘不失不退是念。入如是觀中而不隨他。是人得如是堅牢增上念。故名為成就念根。

持世。何謂菩薩摩訶薩能得定根。能得定根方便。菩薩摩訶薩於聖地中常行禪定。不依禪定不貪禪定。善取禪定相。善得禪定方便。善能生禪定。亦能行無緣禪定。悉知諸禪定門。善知入禪定。善知住禪定。善知起禪定。而於禪定無所依止。善知所緣相。善知緣真相。亦不貪受禪味。於諸定中自在遊戲而不隨他。亦不隨禪生。於諸定中得自在力。於諸定中不以為難。不以為少。隨意所欲。是人得如是增上禪定。故名得定根。得定根方便。持世。何謂菩薩摩訶薩成就通達慧根。所謂能正滅諸菩薩摩訶薩能成就通達慧根。所謂能正滅諸苦。是人成就是通達慧。處處所用皆得離觀。

捨觀成就隨涅槃智慧。成就是慧根故。善知三界皆悉熾然。善知三界皆是苦。以是智慧無願。無生無作無起。見出一切有為法道。為具足諸佛法故。勤行精進如救頭然。是菩薩智慧無能沮壞。以是通達智慧能出三界。亦不依止三界事。斷一切有為法中喜。一切可厭離。心亦不住色無色界。成就增上智慧。成就無量功德。猶如大海。以是智慧於一切法方便中無有疑難。是人以是智慧通達三界。於三界中心無所繫。得是增上慧。故說名度慧根。得慧根方便。持世。何故名之為根。增上義。故說名為根。不動義。故說名為根。無能壞故。說名為根。無能退。故說名為根。不隨他。故說名為根。不退轉。故說名為根。無能牽。故說名為根。隨順正法。故說名為根。不貪著。故說名為根。不雜。故說名為根。又持世。菩薩摩訶薩善知眾生諸根。亦能善學分別諸根。菩薩知染欲眾生諸根。知離染欲眾生諸根。知瞋恚眾生諸根。知離瞋恚眾生諸根。知愚癡眾生諸根。知離愚癡眾生諸根。知欲墮惡道眾生諸根。知欲生人中眾生諸根。知欲生天上眾生諸根。知軟心眾生諸根。知上眾生知中眾生知下眾生諸根。知壞敗不壞敗眾生諸根。知勤修不勤修眾生諸根。知巧不巧眾生諸根。知有罪無罪有垢無垢。知瞋礙不瞋礙。知隨順不隨順。知障礙不障礙。眾生諸根。知欲界行。知色界無色界行。眾生諸根。知厚善。

根薄善根。知畢定不畢定。邪定眾生諸根。知慳貪離慳貪。知戲調不戲調。知狂惑不狂惑。知輕躁不輕躁。知瞋恚不忍。知柔軟能忍。知深厚慳。知具足施眾生諸根。知信者知不信者。知恭敬者知不恭敬者。知具足持戒。知清淨持戒。知具足忍辱。知懈怠知精進。知散心知得定。知無智慧知有智慧。知闇鈍知不闇鈍。知增上慢知不增上慢。知行正道知行邪道。知妄念。知得念安慧。知散根知攝根。知壞根不壞根。知淨根不淨根。知明根知發小乘根。知發辟支佛乘根。知諸菩薩根。知發佛乘根。是菩薩得度如是諸根分別方便。於如是等眾生分別諸根智慧中方便不隨他故。說名得諸根方便。亦名不為他所牽。亦名不可破壞。亦名不退轉。亦名得方便力。亦名得人根。亦名得諸天龍神夜叉乾闥婆阿修羅迦樓羅緊那羅摩睺羅伽人非人等根。亦名得最自在。亦名得不壞不動。亦名到彼岸者。成就如是功德者。於一切法中。疾得自在力。

持世經卷第三

持世經卷第四

姚秦龜茲三藏鳩摩羅什譯

持世經八聖道分品第八

持世。何謂菩薩摩訶薩善能知道。菩薩摩訶薩安住道中。何等為道。所謂八聖道分。正見。正思惟。正語。正業。正命。正精進。正念。正定。持世。何謂菩薩摩訶薩名為行八聖道分。何謂

名為得八聖道分方便。菩薩摩訶薩得正見安住正見。為斷一切見。故行道。為斷一切諸見。故安住於道。乃至斷涅槃見。佛見。何以故。持世。一切諸見皆名為邪。乃至涅槃見。佛見。破壞一切貪著。諸見。故名為正見。又無諸見。無取諸見。不念不貪著。不緣不行。不分別。一切諸見是名正見。以是正見為見何等。見一切世間虛妄顛倒。為諸見所縛。如是見時名為安住斷一切見。於是正見亦不念不見不貪著。分別。乃至涅槃見。佛見。為不起一切見。故行。云何名為正見。一切法寂滅。念相不生。不滅。同於涅槃。如是亦不念不分別。是一切法。不念不分別。不現在前。不正不邪。不取不捨。是名出世間正見。何故名為出世間正見。是人不得世間。不得出世間。度世間已。無所分別。是故名為出世間正見。正見者。如知見世間。出世間亦如是。是人。不復分別。是世間。是出世間。斷諸憶想分別。名為出世間正見。是人。不見邪。不見正。斷一切心所念。名為正見。又正見者。於諸法中。更無差別。是故說名正見。又正見者。如實知諸邪見義。又正見者。觀諸邪見。即是平等。是名菩薩摩訶薩安住正見。

持世。菩薩摩訶薩住正見中。如實知正思惟。作是念。一切思惟皆為是邪。乃至涅槃思惟。佛思惟皆是邪思惟。何以故。斷諸分別名為正思惟。無所分別名為正分別。斷分別是正分別。何以故。是人。知見一切思惟相。已則無有邪。是人。更不分別。是此。是彼。住如是正分別中。更不得諸分別。若正若邪。如是之人。離諸分別。過諸分別。故說名正思惟。正思惟者。即是分別。知見一切分別。皆虛誑不實。從顛倒起。諸分別中。無有分別。是人。安住正思惟。更不得分別。若正若邪。離諸分別。過諸分別。斷諸分別。故說名正分別。是人。爾時於一切分別中。無所繫縛。知見諸分別性。皆平等。故。是名安住正思惟。

持世。菩薩摩訶薩勤集正語。是人。見一切語言虛妄不實。從顛倒起。但憶想分別。從眾因緣有。作是念。是語言相。語言中不可得。滅一切語。如實知一切口業名為正語。是語言無所從來。亦無所去。能如是見者。名為正語。是人。爾時安住實相中。有所語言。皆是正語。是故說安住正語中。是人。得住第一清淨口業。亦知見諸口業相。亦通達一切語言。是人。所說終不有邪。是故說名住於正語。

持世。菩薩摩訶薩善知一切語業。皆是邪業。知一切諸業。虛妄無所有。不作不起。何以故。諸業中。無一決定。滅一切業。名為正業。正業者。於業不分別。若正若邪。入諸業平等。故。不分別業。若正若邪。是故說名正業。又正業者。則是不繫三界義。如實知見義。如實平等中。更無分別是正。是邪。菩薩行如是正業。如實知見一切業。故。如實於法。無取無捨。是故說名行正業。正業中。無有邪業。是人。如實知見。故。說名住於正業中。

持世。何謂菩薩摩訶薩善知一切諸命。皆是邪命。何以故。若有命相。法相。取相。乃至涅槃相。佛相。乃至清淨佛法相。住於是中。作清淨



命皆名邪命。正命者，捨諸資生所著斷諸販賣，不分別不戲論。過一切戲論是名正命。正命中更不分別是邪命。是正命，即得一切清淨命。是故說名得清淨正命。又一切諸命皆不生無有邪正。是人名為得清淨命。安住正道無有戲論。住是正命中，不取正命不捨邪命。是故說名住正命中。是人爾時不名住正。不名住邪。得清淨平等命。離於命相無動無作。不念命不念非命。但名為如實知者。如實見者。是故說名住正命中。

持世。何謂菩薩摩訶薩善知正精進。菩薩摩訶薩住正精進。若菩薩為斷一切精進道。故名為住正精進。何以故。一切精進皆為是邪。諸有所發有作有行皆名為邪。何以故。一切法皆是邪作。有所發作皆是虛妄。若虛妄者即亦是邪。正精進者無發無作無行無願。一切法中斷有所作。是菩薩於一切法中斷有所作。乃至涅槃相佛相中不生有所作相。是人善知一切所作皆為虛妄。為無所作。故行道。若是正者則無所作。一切法平等無差別。無有所作。過所作相。是菩薩善知精進非是精進道。不取不捨。故說名住正精進。正精進者即是諸精進不可得義。即是諸法如實知見義。所謂正精進如是見者。不復分別是邪精進。是正精進。是故說名正精進。

持世。何謂菩薩摩訶薩善知正念。菩薩摩訶薩知見一切念皆是邪念。有所念處皆是邪念。何以故。一切念是邪念。若於處所念生皆是邪念。無憶無念是名正念。何以故。一切念從

虛妄因緣起。是故有生念處皆為邪念。若於處所無生無滅。是名正念。無有處所起念。業是名安住清淨念中。無處生邪念。是人知見一切法皆為是邪。是正法中無念。是故說安住正念中。又正念者。於法無有分別是正念。是邪念。是人通達一切念皆無念相。常行六捨心。故說名住正念。是人更無所貪樂。亦不分別是無念。以諸法平等通達一切念。是人如實知見一切念故。若念若非念。無取無捨。是故說安住正念中。是人所念更不分別是等是不等。於念非念不隨不緣。以無緣故。知一切念非念。若念若非念不復在心。是人安住正念。故不可說不可說。斷一切語言。離一切語言。如實知一切語言。不分別此彼。故說名安住正念。

持世。何謂菩薩摩訶薩安住正定。菩薩摩訶薩觀一切定皆是邪定。何以故。凡諸法中所取緣定相。所取知定相。所取三昧戲論定相。皆名為邪。邪者即是貪著義。是定不爾。如所緣取相不取相。無求無戲論無憶念。名為正定。若不貪著不分別此彼。斷貪著喜不受定。味壞取定。相心無所住。是名正定。又正定者。不依止一切定中而不戲論。如實通達法之本體。善知定相心不貪著。欲破彼此念道。如是語亦不分別。斷一切分別故。名為正定。又正定中更不生邪正想。破一切想。斷一切想。滅一切想。故名為正定。正定者不生邪正。不分別邪正。是名正定。何以故。是菩薩通達諸定方便。住是正定中。不復為若定若定相所繫。過諸定相。故說名正定。正定名於法無所

戲論。諸法平等中無有戲論。所謂是正是邪。正定者即是諸法平等義。正定者能出諸禪定三界一切有為法。能如實知見一切五道生死義。持世。是名諸菩薩摩訶薩住如是定中。名為得正定方便。名為善知道。善知道方便。所謂如實知見能至涅槃道。

#### 持世經世間出世間品第九

持世。何謂菩薩摩訶薩善知世間出世間法。何謂得世間出世間法方便。持世。菩薩摩訶薩正觀世間出世間法。何等為世間法。

菩薩作是念。凡所有法憶想分別。從顛倒起。眾因緣生。繫虛妄緣。從二相起。空無所有。如虹雜色。亦如火輪。誑於凡夫。破壞義。故假名世間。是名世間。諸世間法皆非是實。從虛妄緣起。不作不起相。但因陰界入色聲香味觸法故說。因名色故說。隨凡夫人心所貪著。又隨種種貪著邪見。如亂絲無緒。如茅根蔓草。互相連著。隨顛倒相應。故說名世間法。何等為出世間法。如是世間法從本已來。如實性離。是名出世間。何以故。智者求世間法不可得。求出世間法不可得。無世間無出世間。處是中無分別是世間。是出世間。但為世間故。說出世間。世間實相即是出世間。何以故。世間無定相可得。世間相從本已來。常空。世間法不決定故。世間從本已來。是寂滅相。是菩薩如是觀世間出世間。不可得世間。亦不貪著出世間。是人。不念不著世間。出世間故。不與世間諍訟。何以故。智者通達世間是虛妄相。見世間實相。故更不分別是世間。是出世

間何以故持世世間者即是五受陰義一切世間法皆攝在中智者求陰不得陰不得陰性不得陰來處不得住處不得去處無五陰十二入十八性無分別無名字無性無相無行即名出世間

持世菩薩觀世間出世間法時不見世間與出世間合不見出世間離世間是人離世間見出世間亦不離出世間見世間是人復緣於二行所謂是世間是出世間何以故持世世間如實相即是出世間世間中世間相不可得世間法中世間法不可得以無所有故通達是法即是出世間持世若世間與出世間異者諸佛不出於世諸佛亦不說一切世間不可得一切世間不生如實知見一切世間持世若不得世間不取世間即是出世間是故當知如實知見世間通達世間不可得故即說出世間是故諸佛出於世間一切諸法若世間若出世間以不二分別證如實知見故即是說出世間法持世如是世間甚深難可得底依世間法者得世間法者稀望出世間法者於世俗語生第一義相者住在二法者不能得入如是法中何以故是人不知世間不知出世間是皆行二法者持世行二法者不能通達世間出世間持世菩薩摩訶薩如是善知世間出世間法亦得世間出世間法方便

持世經有為無為法品第十

持世何謂菩薩摩訶薩善知有為無為法得有為無為法方便持世菩薩摩訶薩正觀擇

有為無為法云何為正觀擇是有為法無有作者無有受者是有為法自生自墮數中是故名有為法是有為法以虛妄因緣和合行云何為行自墮數中以二相緣知故名有為法生是法無有作者無使作者是法自生無能起作者是故說名有為法是諸有為法不在內不在外不在中間不合不散從虛妄根本分別起無明因緣故皆無所有但以諸行力故有用是法無有作者無有起者是名有為有為者即是繫義隨凡夫顛倒所貪著說智者通達不得有為法不得有為所攝法智者所不數故名有為法何以故諸智者不得有為分別為凡夫世俗假名故分別是有為賢聖不隨一切諸法名數諸賢聖離諸法名數是故說得無為者名為賢聖智者通達一切有為法皆是無為是故不復起作諸業智者知見一切有為法起相虛誑妄想是故不復起作有為何以故有為法無有定性一切有為法皆無性無起作何以故持世無有行有為緣而能通達無為通達無為者更不復緣有為云何為通達智者見一切有為法皆虛妄無有根本無所繫屬不墮數中如是觀時不復貪著有為緣亦不取有為法何以故持世非離有為得無為非離無為得有為有為如實相即名無為何以故有為中無有為無為中無無為但為顛倒相應眾生令知見有為法故分別說是有為法是無為法是有為相是無為相於是中何等為有為相所謂生滅住異何等為無為相所謂無生無滅無

住異是有為相無為相但為引導凡夫故說持世有為法無生相無滅相無住異相是故說生滅住異相無相無生若是有為法定有三相佛當決定說如是相是生如是相是滅如是相是住異持世如如來說一切法皆是無相持世無生若當有相無滅若當有相無住異若當有相佛應決定說是無為相持世若無為有相有說即非無為以說相故但凡夫以數法故說有為三相所謂生滅住異無為三相所謂無生無滅無住異持世若人通達知見有為無為法是人更不復有生滅住異是故說得無為者持世生滅者即是見集沒義若法無集則無有沒若不起集則不有退亦無住異持世是名有為如實知見若人如實知見有為則不墮數中所謂生滅住異菩薩如是思惟有為無為法不見有為法與無為法合亦不見無為法與有為法合但作是念有為法如實相即是無為則更不復有所分別若不分別有為無為法即是無為法若分別是有為是無為則不能通達無為斷一切分別是名通達無為如實通達緣性斷諸緣故不在數不在非數持世是名菩薩摩訶薩有為無為法方便所謂於諸法無所住無所繫亦不貪受若有為若無為法

持世經本事品第十一

持世若菩薩摩訶薩能如是善知五陰善知十八性善知十二入善知十二因緣善知四念處善知五根善知八聖道分善知世間出世間法善知有為無為法當得善知諸法實

相亦善分別一切法文辭章句亦得念力以是念力轉身成就不斷念乃至得阿耨多羅三藐三菩提

持世過去無量阿僧祇劫爾時有佛號閻浮檀金須彌山王如來應供正遍知明行足善逝世間解無上士調御丈夫天人師佛世尊持世是閻浮檀金須彌山王佛壽命五劫有無量聲聞眾其佛國土清淨嚴飾豐樂安隱其諸眾生具足快樂少於貪欲瞋恚愚癡易化易度易淨持世是閻浮檀金須彌山王佛為諸菩薩亦說是斷眾生疑菩薩藏經持世時有菩薩名曰寶光聞是陰界入緣四念處五根八聖道分世間出世間有為無為法方便即時發於精進二十億歲終不生惡心若貪欲若瞋恚若愚癡若利養若飲食若衣鉢但為入如是法方便門故常勤精進持世是寶光菩薩於閻浮檀金須彌山王佛所盡其形壽常修梵行命終之後還生其佛國土人中年少命終即復還生於其佛所修行梵行於一一劫五百生死最後生閻浮檀金須彌山王佛欲涅槃時在第五劫成就如是多聞法亦得如是諸法實相方便所從佛聞諸法皆能憶念得如是念力故白佛言聽我廣演諸法即於其世中度脫無量無邊眾生令住阿耨多羅三藐三菩提道中是閻浮檀金須彌山王佛入涅槃時為持法故護念寶光菩薩佛滅度後法住一劫是人於是一劫五百年世中常生人間出家學道亦常於是諸法實相得自增長亦復利益無量無邊眾生持世

是寶光菩薩如是展轉得值萬億諸佛末後無量光佛為其授記過阿僧祇劫當得阿耨多羅三藐三菩提於阿僧祇劫中更值百千萬億那由他諸佛後得阿耨多羅三藐三菩提成佛號一切義決定莊嚴如來應供正遍知明行足善逝世間解無上士調御丈夫天人師佛世尊有無量無邊阿僧祇菩薩眾無量聲聞僧佛壽二劫其佛國土豐樂安隱普皆莊嚴持世是故菩薩若欲得如是法中善知方便當勤行精進勤求讀誦修集如是之法又復菩薩摩訶薩欲得如是諸法方便故於四法中勤行精進何等為四一者出家二者獨行三者持戒清淨四者除懈怠心是為四菩薩有是四法勤求多聞安住忍辱當疾得值佛三者隨法行四者除罪業障是為四又復持世菩薩摩訶薩如是法中應勤行精進當得清淨布施力清淨持戒清淨忍辱清淨精進清淨禪定清淨智慧力菩薩摩訶薩住是法中疾得如是方便力又持世菩薩摩訶薩雖行頭陀細法亦能常於眾生有大悲心是人入大悲心於是法方便中勤行精進持世復有菩薩摩訶薩欲得如是法當入諸陀羅尼門勤行精進何謂為入陀羅尼門故勤行精進所謂善觀一切法無量緣觀一切法無量方便亦觀無量方便起如是觀時以三昧門方便善入諸法門無量緣亦入無量方便亦入無量方便起於是法中得力故善知諸法實相亦善分別一切文辭章句亦得

念力亦得轉身成就不斷念不退法乃至得阿耨多羅三藐三菩提又復持世菩薩摩訶薩入諸陀羅尼門故通達一切諸法隨宜因緣以一因緣能入千種因緣隨智慧力得諸法方便又復持世菩薩摩訶薩如是法中勤精進故入一相門三昧得一相門三昧故入無量相門三昧如是入已以種種因緣方便故能入是諸法門如是諸菩薩入一切諸法門已當得一切諸法方便又復持世菩薩摩訶薩多行智慧故善知諸禪定相亦善知無緣三昧是三昧力故能善知無量緣無量禪定起是菩薩住此地中能得一切諸法實相方便又復持世菩薩摩訶薩常觀世間緣方便常觀有為法緣方便常觀世諦緣方便亦常勤行壞散一切法緣方便亦無貪著處是菩薩修集如是法疾得諸法實相方便又復持世菩薩摩訶薩勤行精進起方便力而亦常觀諸法實相不依止世樂亦不雜行世間之法成就如是法者疾得諸法實相亦善分別一切法文辭章句亦得念力亦得轉身成就不斷念乃至得阿耨多羅三藐三菩提持世是故菩薩摩訶薩欲得如是諸法彼岸當於是法如說修行持世汝等於是法中勤行精進汝等不久當於此法得無礙智慧持世過去無量無邊不可思議阿僧祇劫爾時有佛號無量光德高王如來應供正遍知明行足善逝世間解無上士調御丈夫天人師佛世尊是無量光德高王佛壽命一劫其佛國土以七寶網羅覆其上普以七寶諸多羅

樹莊嚴世界。是諸多羅樹亦復以七寶網羅覆其上。一一樹下敷師子座。諸多羅樹皆出天衣。諸座皆以琉璃寶閣浮檀金赤真珠所成。諸多羅樹四邊皆有香樹華樹圍繞莊嚴。一一樹下各有池。八功德水充滿其中。諸池皆以頗梨車渠赤真珠所成。諸池水上皆有青赤白紅蓮華遍覆水上。諸池皆以七寶為欄楯。持世。彼佛國土皆以如是眾寶莊嚴世界。四邊復有寶樹。如忉利天波利耶多羅迦持毘陀羅樹。如是寶樹千萬億數圍繞世界。是諸寶樹光明障蔽一切日月光明不復現。持世。諸多羅樹及諸寶網。自然皆出種種妙香。如天伎女歌頌之聲。其佛國土常出如是微妙音聲。無三惡道亦無三惡道名。持世。是無量光德高王佛為諸眾生多說如是之法。所謂般若波羅蜜及菩薩藏斷一切眾生疑喜一切眾生心經。持世。其無量光德高王佛說法時。一日之中無量百千萬億眾生發阿耨多羅三藐三菩提心。已發心者皆得具足助菩提法。持世。是無量光德高王佛。以是因緣教化成就無量無邊眾生於阿耨多羅三藐三菩提。其佛國土菩薩摩訶薩其數甚多。持世。彼佛滅後法住半劫。是無量光德高王佛滅度之後法欲盡時。下方過十佛世界有菩薩名無量意。命終來生。始年十六出家學道。於無量光德高王佛法欲滅時。聞是菩薩摩訶薩解說是陰界入方便經。是無量意菩薩聞此經已發大精進。於是法中盡到其邊。成就深方便力。是菩薩善根因緣故。於彼

命終得值二十億佛。皆得成就如是之法。常識宿命。童真出家修行梵行。常得念力。世世不離如是之法。世世成就不斷念。然後得成阿耨多羅三藐三菩提。號無量光莊嚴王佛。持世。是故菩薩摩訶薩若欲疾得阿耨多羅三藐三菩提。若欲疾得具足一切智慧。於我滅後後五百歲。惡世之中。當勤護持發大誓願。應生大欲大精進。大不放棄。於後世中常當護持如是等經。

爾時跋陀婆羅伽羅訶達多菩薩等為上首。從坐而起。向佛合掌白佛言。世尊。我等於佛滅後後五百歲。法欲滅時。我等當為守護如是等經。勤行精進。讀誦聽受。亦當復為他人廣說。復有若干千數菩薩。從坐而起。合掌向佛。瞻仰尊顏。發是願言。世尊。我等後世後五百歲。作是誓願。於如是等甚深無染污諸佛所。聽能生菩薩諸善功德。能具足諸菩薩助菩提法。我等當共護持聞如是法。當大清淨其心歡喜。專心勤求受持讀誦。佛便微笑。即時三千大千世界無量光明遍滿其中。三千大千世界六種震動。爾時阿難從坐而起。偏袒右肩。右膝著地。合掌白佛言。世尊。何因緣故。今者微笑。地大震動。佛告阿難。汝見此等菩薩發大誓願。後世護持如是甚深無染污法不阿難。是諸菩薩非但今世發是誓願。阿難。我念是諸菩薩於無量無邊諸佛所發如是誓願。三時護持諸佛之法。亦能利益無量眾生。今者亦復三時護持我法。於今現在及我滅後。法欲滅時。亦大利益無量眾生。持世。

如跋陀婆羅等。三時護持我法。亦復於此賢劫之中。三時護持諸佛之法。亦於未來諸佛所。三時護持如是之法。阿難。我今讚說是人。成就如是無量功德。說不可盡。憐愍利益安隱眾生。阿難。若我悉說是人如是功德。人不能信。若人不信佛語。是人長夜失於利益。受諸苦惱墜墮惡趣。阿難。我今粗說是等菩薩利益眾生。假使如三千大千世界滿中眾生。皆墮大地獄中。中有一人語諸眾生。汝等莫怖。我今一一代汝受此大地獄苦。是人即時出地獄眾生。一一皆為多千萬歲受地獄苦。阿難。於汝意云何。是人為大利益大安樂不。阿難言。世尊。為大利益大安樂。阿難。是人出諸眾生已。現其力勢。皆使令得成就世間第一快樂。阿難。是人為能有恩能與眾生樂不。阿難言。世尊。是人所利益非言所說。阿難。我今實說。是跋陀婆羅伽羅訶達多菩薩等利益眾生。是人利益眾生。是二利益安樂之事。算數譬喻不可為比。何以故。阿難。是人樂具皆是。有為相違之法。不為厭足故。不為離欲故。不為智慧故。不為沙門果故。不為涅槃故。阿難。是諸菩薩等利益眾生。與無上樂。一切智人樂。為求佛道者。皆作佛事。未入正位者。令得聲聞辟支佛地。以佛法化諸菩薩示教利喜。阿難。是諸菩薩能示教利喜。諸菩薩眾。為不斷佛種故。為守護一切智種故。住於世間。阿難。是人過去本行菩薩道時。無量百千萬億那由他劫。皆使有佛不令斷絕。亦於未來無量百千萬那由他劫。皆使有佛亦不斷

絕。何以故。阿難。是諸菩薩本行菩薩道時。已令無量諸佛住於佛道。是諸菩薩世世護持教化。成就百千萬億諸佛。皆使成阿耨多羅三藐三菩提。從是以後。亦復教化無數百千萬億眾生。令住佛道。教化力故。具足佛法。亦皆當得阿耨多羅三藐三菩提。

阿難。是跋陀婆羅等。為與眾生佛樂。一切智慧樂。故勤行精進。阿難。若人實說何等是諸菩薩父母。救舍依洲。生諸菩薩。當說是跋陀婆羅伽羅訶達多等五百菩薩。是阿難。若人實問。何等是諸菩薩種。當言跋陀婆羅伽羅訶達多等五百人。如是善男子等。為不斷佛種。不斷一切智慧種。故住於世間。是善男子等。亦於後世後五百歲。以是教化方便力故。以樂因緣。令諸眾生不墮三惡道中。亦令無量百千眾生住菩薩乘。阿難。若干千佛說。是善男子等功德。不可得盡。何以故。是善男子等。成就如是不可思議功德。阿難。我於無量百千萬億阿僧祇劫。所集法藏。是善男子等能受護持。阿難。我今以是無量億劫所集法寶。囑累是人。是善男子等。為無量阿僧祇國土中。現在諸佛之所護念。阿難。是善男子等。一切天人世間所應禮事。阿難。是人十方千佛講說法時。常所讚嘆。阿難。我已印可。為斷一切眾生疑故。若人於後末世受持。是經讀誦。通利為人廣說。當知是善男子善女人。近一切種智。有人於後末世。乃至得聞如是深經信解。而發誓願。我皆與受阿耨多羅三藐三菩提記。若於後世後五百歲。生信解心。

勤行精進。護持是經。是善男子善女人。我今亦以是阿耨多羅三藐三菩提法。而囑累之。若聲聞人信受。如是深法。心無違逆。我與受記。後當得值彌勒佛會。若求佛道者。聞如是法。受持信解。是人皆為彌勒佛所授記。以本願故。出家學道。阿難。當知是善男子善女人等。若於後世後五百歲時。於是法中。勤行精進。當知是人善根猛利。

持世經囑累品第十一

爾時持世菩薩摩訶薩。白佛言。世尊。惟願利益諸菩薩摩訶薩。故護念是經。菩薩摩訶薩若於後世得聞。是法。心淨喜樂。亦為具足如是法。故勤行精進。爾時世尊。護念是經。即以神力。令此三千大千世界。香氣遍滿。所未曾有。一切眾生。慈心相向。佛護念已。告持世菩薩。持世。我今護念是法。印品經。斷一切疑。故持世。若有能受持讀誦。是經者。不久當得一切智慧。惟除本願。我今亦與是人受記。疾得具足一切智慧。故持世。菩薩摩訶薩。若受持讀誦。是法。印品經。思惟廣為人說。是人不久當疾得五陰方便。十二入。十八界。十二因緣。四念處。五根。八聖道。分世間出世間法。有為無為。法方便。亦疾得諸法實相。亦疾得分別一切法章句。亦疾得念力。亦疾得轉身成就。不斷念。乃至得阿耨多羅三藐三菩提。持世。是經後世能與眾生作大法。明大智慧。光福德。因緣。亦能與諸菩薩。具足助阿耨多羅三藐三菩提法。持世。若諸菩薩。於後末世時。得值是經。及餘深經。菩薩藏所攝。與諸波羅蜜。

相應。是人。不為魔事所覆。不為業障所惱。持世。若是人。未得無生法忍者。我與受記。於當來世。第二第三佛。當得無生法忍。已得無生法忍者。於一切法中。疾得自在力。疾得淨佛國土。疾得無量聲聞眾。疾得無量菩薩眾。持世。我今說是法。印。為斷後世一切疑。故持世。菩薩摩訶薩。見四利。故於後末世。護持如是等經。而發誓願。何等為四。諸菩薩。作是念。我當疾得無量無邊功德。亦令眾生。生大善根。亦為諸佛。護持正法。亦作諸佛。持法藏人。亦為無量諸佛。所見讚歎。是名四。持世。菩薩摩訶薩。復見四利。於後末世。護持是經。而發誓願。何等為四。諸菩薩。作是念。我等於後恐怖惡世。守護法。故行大精進。於後惡世。正法壞時。能持法藏。為此難事。於後惡世。中法亂眾。生亂時。我等守護法。故其心不亂。爾時當得具足忍辱。以無瞋。道守護於法。是名四。持世。菩薩摩訶薩。見是四利。故於後惡世。護持如是等深經。而發誓願。跋陀婆羅伽羅訶達多等五百菩薩。及餘菩薩。得聞是法。印品經。佛前合掌。於後惡世。發願護持。是深法者。佛以右手。皆摩其頭。作如是言。諸善男子。我於無量阿僧祇劫。所集阿耨多羅三藐三菩提。大法寶藏。甚為難集。受諸無量無邊憂悲苦惱。亦捨無量無邊歡喜快樂。今以囑累汝等。於後末世。當以是無量劫。所集法藏。善開與人。廣為四眾。分別解說。此正法。種令不斷絕。汝等還當。然大法炬。諸善男子。如來今者。請汝等佛子。住佛所住。我於是無量百千萬億阿

僧祇劫所集法寶藏為諸天人廣宣流布。即時跋陀婆羅伽羅訶達多等。即禮佛足。作如是言。我等隨力所能。亦承佛威神。當於後世廣宣流布。是法寶藏。說是法印品經時。無量無邊阿僧祇。一生諸菩薩善根成就。亦有無量百千萬億眾生。發阿耨多羅三藐三菩提心。畢定受阿耨多羅三藐三菩提記。佛說是經已。持世菩薩及跋陀婆羅伽羅訶達多等。及餘菩薩并諸四眾。一切天人阿修羅等。聞佛所說皆大歡喜。

三曼陀跋陀羅菩薩經

No. 483

西晉居士聶道真譯

五蓋品第一

聞如是一時佛在摩竭提國清淨法處。自然金剛座。光影甚明。無所不遍照。與眾摩訶薩等無央數菩薩共會坐。三曼陀跋陀羅菩薩。文殊師利菩薩最第一。文殊師利菩薩問三曼陀跋陀羅菩薩言。若有人求菩薩道者。善男子。善女人。欲得無蓋清淨者。當施行何等法。自致得之乎。三曼陀跋陀羅報文殊師利菩薩言。若有善男子。善女人。欲求菩薩道者。當整衣服。晝夜各三。稽首十方諸佛。作禮悔過。悔諸所作惡。諸所當忍者。忍之。諸所當禮者。禮之。諸所當願樂者。願樂之。諸所當勸請者。勸請之。如是一切諸罪。蓋諸垢。蓋諸法。蓋悉除也。一切功德。悉得具足。般若波羅蜜。兜沙

陀比羅經。一切三昧。一切諸陀隣尼。一切遍。想拘舍羅。是為諸經中尊。將如是者。為已得禮。一切諸佛。其意至心也。

悔過品第二

三曼陀跋陀羅菩薩言。一切人身所行。口所犯心所念。惡。一切諸佛。剎其中。塵等起。意念。一切諸惡。某皆為其悔過。某從本所作。為有惡於諸佛。諸菩薩。諸迦羅蜜。父母阿羅漢。辟支佛。怛沙。竭護。怛沙。竭寺神。怛沙。竭法中。諸所犯過。惡。須呵摩提阿彌陀佛。剎土。一切諸佛。一切諸佛。剎一切諸佛法。若有狐疑起。意不信者。某為其悔。一切罪過。其有於一切諸佛。諸菩薩。諸迦羅蜜。諸父母。諸阿羅漢。諸辟支佛。一切諸人。所可誹謗者。若恣隨欲。恣隨癡。恣隨自用。若有頑。恨。不與人語。若為貪。姪所牽。為慳。嫉。所牽。為貪。飡。所牽。為諛。諂。所牽。七百五十諸欲。所牽。其心亂。時不能自專。為一切所蓋。為一切所畏。所起意。有過失。今某皆為悔。一切罪過。

某從阿僧祇劫起惡意於佛。若鬪亂比丘僧。若害阿羅漢。若害父母。若見正法言非法。若見非法言是法。若訓笑一切人。所思念。常與非法之事。若他所犯過。若欲犯若已犯。其多沙竭所教誡。若犯之。今世若前世不知佛法。比丘僧時。諸所犯過。惡。今某皆為悔。一切罪過。某諸所作。邪嫉之意。若有佛。斷止人不得令見。若有明經說法者。斷止人不得令聞。若有迦羅蜜。斷止人不得令住會。若有人施與鉢。震越飯食。床臥具。病瘦醫藥。所作功德。呵止

人不得令與。作無央數不止。展轉相教起罪。今某皆為悔。一切罪過。

某諸所作罪。見人犯者。於邊勸助。用是故。為罪所牽。生於末世。若生於貧家。若離迦羅蜜。若有佛不能得見。若有菩薩。迦羅蜜不能得與共會。而不能得聞經法。以諸所作惡。故不能及。值是聖賢身。今某皆為悔。一切罪過。

某諸所作罪。不能及。逮聞法。或聞法。其心不能受法。若已受而復忘失。不能堅持法。不能諦持法。而怯劣無瞻。其形色不能致得端政。所生常少財寶。不能得陀隣尼行。不能得三昧行。不能得般若波羅蜜行。不能得無念慧。行。不能得遍。想拘舍羅。所入慧。不能得兜沙。陀比羅。無所罣礙。所入慧。其一切諸所作罪。不能及。逮是也。今某皆為悔。一切罪過。

某諸所作罪。不能得一切法。行所入慧功德。不能得一切人。意所行慧功德。不能得一切人。因五根所入慧功德。不能得一切人。慧律所入功德。不能得一切法。慧所入功德。不能得一切人。泥洹慧功德。其一切諸所作罪。不能及。逮是也。今某皆為悔。一切罪過。某諸所作罪。不能得洞視徹聽。不能得神足飛行。不能得自知宿命。不能得知去來之事。不能得梵天音聲。不能得身口意功德。不能得清淨高行。而不能得具足於功德。其一切諸所作罪。不能及。逮是也。今某皆為悔。一切罪過。若他人起惡意。向某。若有眾兵。若某起慈心。向他人。若有眾兵。若致一切諸蓋所畏。某合會於諸佛前。諸眼諦慧。遍諦所言。則受諦。某於

是諦前自歸悔，復自發舉自發竟，自悔責不敢覆藏，從今已後不敢復犯。

#### 願樂品第二

三曼陀跋陀羅菩薩言，善男子，善女人求菩薩道者，當作是願樂。今某自歸曉，一切於諸佛曉，菩薩迦羅蜜及父母諸阿羅漢辟支佛及一切人，至心求哀，不可曉者，今皆曉之。如諸佛所知如是者，所可自歸，為已自歸也。復次，今某禮一切諸佛，一切諸菩薩諸迦羅蜜父母及阿羅漢辟支佛，皆為作禮。最中，最上無上，明中明，無有雙亦無比。如諸佛所知如是者，所當作禮，為已作禮也。

復次，今某願禮諸佛功德，一切諸菩薩諸迦羅蜜功德，諸阿羅漢諸辟支佛功德，及十方一切人所作功德，如諸佛所知如是者，所當禮諸功德，為悉禮也。

是則菩薩慧，若善男子善女人有是功德者，願樂助其歡喜。若有逮佛慧者，所當願樂。某已願樂也。其未作功德者，今作功德。某皆願樂，其有尊復尊所作功德，某亦願樂。持某所作願樂功德，令十方一切皆悉得也。

#### 請勸品第四

三曼陀跋陀羅菩薩言，善男子，善女人求菩薩道者，當作是請勸。某至心請勸，一切諸佛。今現在佛阿耨多羅三耶三菩及至阿惟三佛，其已成悉等，知未轉法輪者，某請勸諸佛轉於法輪。今諸佛所轉法輪者，以用請勸，故所說經法，令一切人各得其所，悉令安隱。及諸天龍鬼神乾陀羅阿須倫迦留羅甄陀羅

摩休勒人非人，其在泥黎薛荔禽獸諸勤苦中者，皆令得解脫。其無所曉者，皆令捨癡意，悉得正意入於佛道。

復次，其諸佛所欲般泥洹者，某請勸且莫般泥洹，用一切人故。且自住無央數劫，以法身住為無所住。所說經法，令一切人各得其所。皆令勇猛具足。三曼陀跋陀羅菩薩法行，令一切人悉以是為本，各得安隱。及諸天龍鬼神乾陀羅阿須倫迦留羅甄陀羅摩休勒人非人，泥黎薛荔禽獸諸勤苦者，早得解脫。其無所曉者，令捨癡意，悉得正意入於佛道。其作邪者，皆捨邪道入於正道，悉住於本無法。

三曼陀跋陀羅菩薩言，善男子，善女人求菩薩道者，當作施與。某所可悔功德，所可忍所可禮，所可願樂，所可請勸，諸功德，若欲作若方作，若已作，諸所作功德，皆一切合會成就。為一福味。如諸佛法，如佛所知，是功德便可所生，致諸佛相，能得自恣法。諸所施與，已受施與而有施與，是施與為正施與。無所著斷，某持是法施與功德，令一切人皆逮得與法。皆令起意，如薩芸若施與等者。今某施與，令如三曼陀跋陀羅菩薩所行。持是功德，令一切與。某莫墮泥黎中，薛荔禽獸勤苦八惡道中生。皆令生有佛處，有菩薩處，皆令生須呵摩提阿彌陀佛刹。某持是功德，因某好心，具足遍發阿耨多羅三耶三菩心。

某持是法施與之功德，為一切人作舍作護。受其自歸為作度，於冥中作明，明中最明於持中作持，持中尊持。一切人未度者，我當度之。

未脫者，我當脫。未般泥洹者，我當令般泥洹。造作一切人，皆令發阿耨多羅三耶三菩心。

某持是法施與之功德，令一切人與某身等。諸所生處，所可起意，常供養諸佛供養諸菩薩。持前所作供養諸佛菩薩，令一切人與某身不離菩薩法，不離迦羅蜜文殊師利及惟摩竭與三曼陀跋陀羅菩薩等。是諸菩薩所行，皆具足陀隣尼清淨三昧，一心不動搖，皆以成就般若波羅蜜所行。悉以曉了，漚沓拘舍羅，所入一切於諸法有差特，令一切人與某逮得是諸菩薩慧行而具足。

某持是法施與功德，在其泥黎薛荔禽獸拘繫縛束中人，皆令得解脫。其無眼者得眼，聾者得聽。其在勤苦中者，皆得安隱。若在是佛刹及彼方佛刹，下至阿鼻泥黎上至無極，其中間蠕動之類，有足無足者，若未來若軟生，若化生，若色無色，若思想無思想，及一切人非人，轉相猗著者，以時能持佛眼見知悉覺。令一切皆得人形入於佛道。聞法悉曉了，受皆得阿耨多羅三耶三菩提心。

某持是法施與功德，令一切人與某持是功德，悉逮諸佛等行，諸菩薩等行，諸迦羅蜜行。令一切人皆至供養，起願得諸佛刹，能令清淨於三世法曉了，能悉譬如金剛無所不穿。令一切人與某皆令得佛智慧，而具足諸所感動能悉等。於諸深慧皆逮得，於諸法而無疑。持是功德，令某具足願。如三曼陀跋陀羅菩薩法行，十種力地皆悉逮，以是為證。持是功德，願令一切人及某皆令得福。

譬福品第五

文殊師利菩薩問三曼陀跋陀羅菩薩言。若有善男子善女人欲求菩薩道者。晝夜各三悔過勸樂法行如上說。其福者云何。三曼陀跋陀羅菩薩報文殊師利菩薩言。若有善男子善女人奉行菩薩道者。持七寶滿閻浮提地內。供養怛沙竭阿羅呵三耶三佛。不如是善男子善女人。晝夜各三勸樂法行。所當悔者。悔之。所當忍者。忍之。所當禮者。禮之。所當願樂者。願樂之。所當請勸者。請勸之。所當施與者。施與之。晝夜奉行如上教。其福出於供養。怛沙竭滿閻浮提七寶。百倍千倍萬倍億倍。巨億萬倍。終不可比。不可計。亦不可譬。說是法時。無央數諸天於虛空中住。持天花香及伎樂供養。散佛及諸菩薩上。文殊師利菩薩三曼陀跋陀羅菩薩說是經已。諸天龍鬼神阿須倫人。非人間經大歡喜。前為佛作禮而去。三曼陀跋陀羅菩薩經。

不思議光菩薩所說經一卷

No. 484

後秦龜茲國三藏鳩摩羅什譯

如是我聞。一時佛在舍衛國祇陀林中。給孤窮精舍。與大比丘僧千二百五十人俱。菩薩摩訶薩五百人。眾所知識。爾時世尊依舍衛大城。時王大臣婆羅門居士及諸眷屬。供養恭敬尊重讚歎。多諸供養衣服飲食臥具醫藥。是如來應供正遍覺。明行足善逝世間解。無上士調御丈夫。天人師佛世尊。生處成就。

種性成就。三昧具足。智慧具足。解脫具足。解脫知見具足。具足十力。四無所畏。佛十八不共法。演說正法。初中後善。文義美妙。具足清白梵行。鮮淨五眼具足。所謂肉眼。天眼。慧眼。佛眼。法眼。善知此世他世所住。

于時世尊善降外道。尼乾陀若提子等。佛法熾盛。人天宗敬。世尊時到著衣持鉢。及比丘僧眷屬圍遶。趣入舍衛大城乞食。去來進止威儀庠序。視瞻容豫。屈伸俯仰。執持衣鉢。皆悉庠序。金色妙身。光明照耀。猶猛火聚寶珠。日月照耀。闇夜三十二相莊嚴其身。以金色足蹈門闥上。當於是時。舍衛大城。示現種種未曾有事。如偈所說。

人仙來入時 釋師子蹈闥 現多希有事  
淨心聽我說 盲者得目視 聾者得聞聽  
裸者得衣服 狂亂得正意 皆歡喜合掌  
觀佛無厭足 眾鼓自然鳴 簫笛自出聲  
鴈鳩鳩鴛鴦 俱出妙軟音 失財得寶藏  
眾寶物出聲 時地六種動 不信得淨心  
勝覺下轉足 淨蓮花承接 觸眾生安樂  
命終得生天 女人妊娠苦 安樂生妙子  
無貪瞋癡惱 父母子俱爾 階陛妙莊嚴  
多億天雨花 眾生無病患 脫一切眾苦  
善逝入城時 一切受安樂 各謂我奉食  
各謂佛看我 人仙福德力 非我說能盡  
爾時世尊於舍衛大城。次第乞食。至於中路。有一空處。捐棄嬰兒。容貌端嚴。極為鮮白。自啖（食）右指。而此空處多狐狼狗。見是嬰兒。舐已而去。無能逼惱。此嬰兒者是福德人。久種善

根。多人住觀。生希有心。往來觀看。空處棄兒。端嚴可愛。歡喜樂見。於是嬰兒。爾時世尊見多人眾往來空處。知而故問。告阿難言。汝可往彼。看是諸人往來空處。何所作為。阿難白言。如是世尊。大德阿難。即往空處。見是嬰兒。容貌端嚴。自啖右指。諦視眾人。其目不瞬。阿難見已。便還佛所。如見而說。世尊。此空閑處。有棄嬰兒。容貌端嚴。甚可敬愛。猶如寶像。觀視諸人。其目不瞬。于時世尊於彼嬰兒起悲愍心。觀本善根。知已成熟。堪能知我所說法義。又知眾生善根成熟。即往嬰兒所。到已於一面住。向此嬰兒而說偈言。本所造惡業。今此報應現。棄捐此空處。嬰兒苦如是。爾時嬰兒承佛神力。自本善力。以偈報佛。

瞿曇猶故有 見棄空處想  
尊在道場時 不知是想耶  
爾時世尊復以偈答 我已知於想  
而我永無想 以憐愍汝故 來至此空處  
爾時嬰兒復說偈言 若不得眾生  
畢竟不可得 尊憐愍於誰 誰所轉悲心  
爾時世尊復說偈言 眾生不知是  
無我空寂滅 為覺悟彼故 我行村城邑  
爾時嬰兒復說偈言 達解空寂滅  
覺了空寂滅 猶有眾生想 如來不斷耶  
爾時世尊復說偈言 佛悲力如是  
覺了空寂已 教化眾生故 導師演說法  
爾時嬰兒復說偈言 猶故有顛倒  
如來未斷耶 無眾生思想 如是生悲耶  
爾時世尊復說偈言 佛之所護持



菩薩生精進 為不達眾生 人尊發莊嚴

爾時嬰兒復說偈言 此是癡莊嚴

若不得於物 若法非是物 何由起莊嚴

爾時世尊復說偈言 此大悲神力

調御世如是 猶不著於物 為眾生說法

爾時嬰兒復說偈言 法無有文字

云何可演說 世間尊敗失 非法作法說

爾時世尊復說偈言 我不敗壞世

我不非法說 眾生自倒惑 我解脫彼結

爾時嬰兒復說偈言 結使無根本

亦無有方所 又不在內外 於何脫彼結

爾時世尊復說偈言 從於妄想生

與顛倒共俱 為斷彼妄想 嬰兒我說法

爾時嬰兒復說偈言 心性自常淨

彼中無垢結 正使多妄想 性淨不生垢

爾時世尊復說偈言 如是如汝說

心性自常淨 客煩惱塵結 無慧者生染

爾時嬰兒復說偈言 結無有方所

亦非方所得 云何名為客 願為我演說

爾時世尊復說偈言 猶如空中雲

可觀無真實 結使生如是 雖見無有實

爾時嬰兒復說偈言 法同等如如

其生性即如 法若是真實 非如不可得

爾時世尊復說偈言 一切非如法

等住於如中 覺了是如已 無過無功德

爾時嬰兒復說偈言 若不得眾生

瞿曇和合誰 先觀察法本 從誰有煩惱

爾時世尊復說偈言 過去及未來

及與現在世 佛知覺了了 為眾生說法

爾時嬰兒復說偈言 所演說三世

及說我能知 便為是大慢 則為自稱譽

爾時世尊復說偈言 我不自稱譽

亦不輕慢他 如如等顯現 是故名如來

爾時嬰兒復說偈言 如無有可得

非言說相應 非言以言說 是則非是如

爾時世尊復說偈言 凡夫隨於想

如中生妄想 為斷除我想 如來出於世

爾時嬰兒復說偈言 正覺無出世

善修無生故 於無生法中 佛出不相應

爾時世尊復說偈言 無生現有生

佛出世顯現 此是世諦說 非是第一義

爾時嬰兒復說偈言 猶故有二想

世諦第一義 於一乘道中 瞿曇相違說

爾時世尊復說偈言 我不道相違

我住不相違 為相違眾生 嬰兒如是知

爾時嬰兒復說偈言 悔過於正覺

我上所言說 是佛力持故 我能如是說

爾時世尊從於衣裏出金色臂起彼嬰兒爾

時嬰兒執佛手指從地而起爾時世尊從彼

空處將是嬰兒趣向正陌是時大眾得未曾

有於世尊所倍生敬禮歎言希有如來世尊

得成如是勝妙之法乃能令此極苦厄者安

住是法爾時世尊告嬰兒言汝業行盡汝可

憶念本造善根令此大眾生希有心現大神

力爾時嬰兒上昇虛空過七多羅樹身放光

明此光遍照三千大千佛之世界以此光故

釋梵護世及餘百千天龍夜叉乾闥婆阿修

羅迦樓羅緊那羅摩睺羅伽見斯光已來詣

佛所到已頂禮佛足以諸天華散供於佛供

養佛已向佛世尊作如是言菩薩光明不可

思議身出光明普遍照此佛之世界令諸無

量眾生得於不思議利當名此兒不思議光

爾時釋迦牟尼世尊即可是名此兒當名不

思議光爾時嬰兒不思議光從空而下住於

地已以佛神力自善根力其形猶如八歲童

子爾時釋提桓因即以天衣施與嬰兒便語

之言嬰兒汝今愍我等故受此天衣勿裸形

住爾時不思議光菩薩嬰兒語釋提桓因憍

尸迦菩薩不以衣服為妙當被法服以為嚴

飾憍尸迦菩薩所服汝今善聽憍尸迦菩提

之心是菩薩服乃至道場成滿具足一切佛

法有慚有愧是菩薩服調伏成就一切眾生

置無過中堅誓莊嚴是菩薩服辦諸事故質

直無偽是菩薩服成就斷除幻惑偽故勤加

精進是菩薩服成滿具足諸善根故志欲喜

樂是菩薩服成滿一切諸佛法故除捨憍慢

是菩薩服成滿一切諸禪定故欲法聞法是

菩薩服成滿般若波羅蜜故不起智慢是菩

薩服成滿具足無著智故作於利益是菩薩

服悲諸眾生具覺知故捨一切物是菩薩服

成滿具足諸相好故護持淨戒是菩薩服成

滿願故調和忍辱是菩薩服究竟成滿梵音

聲故牢強精進無懈退心是菩薩服成滿出

過一切事故得諸禪定解脫三昧是菩薩服

成就滿足大通智故不壞智慧是菩薩服成

就斷除一切結使諸見障故大方便智是菩

薩服成就教化諸眾生故大慈是菩薩服成

①尊(元)明(大)正(禮) ②客(元)明(生)正(禮) ③知+(爾時世尊復說偈言一切法如是等住於如中覺了是如已無過無功德)④

就救濟諸眾生故。大悲是菩薩服。成就生死中無疲厭故。大喜是菩薩服。成就具足於法喜故。大捨是菩薩服。成就捨離愛瞋心故。於諸眾生無惱害心是菩薩服。成就不惱於自他故。敷演說法是菩薩服。成就不自譽毀他人故。如說修行是菩薩服。成就斷除諸結使故。憍尸迦。應如是知菩薩法服。以法莊嚴。生不裸形。爾時釋提桓因於嬰兒所。增加恭敬愛念尊重。白言世尊。愍我等故。令是嬰兒受取此衣。爾時世尊告不思議光菩薩嬰兒。受帝釋衣。于時世尊右手取衣授與嬰兒。爾時嬰兒右膝著地。以其右手受取是衣。受已便著。爾時世尊將不思議光菩薩嬰兒於舍衛大城次第乞食。是時大眾男女大小長者居士。剎利婆羅門王及輔臣。見不思議光菩薩嬰兒生希有心。亦為見佛禮敬供養。悉皆來集。爾時世尊次第乞食。到不思議光菩薩嬰兒所。生母舍。爾時不思議光菩薩即入其舍。前至母所。向所生母而說偈言。

母無有過咎 應當自喜慶 是我本惡業  
今生在母腹 母是我福田 哀愍所生恩  
母勿生羞恥 速往如來所 母今得大利  
腹懷妊我故 如是之功德 往問於導師  
爾時不思議光菩薩語釋提桓因。憍尸迦。與我香華衣服所須。欲奉上母。母當以是供養於佛。當發阿耨多羅三藐三菩提心。爾時釋提桓因以天曼陀羅華及以天香天諸衣服與彼菩薩。爾時不思議光菩薩復向其母而說偈言

受此適意華

天妙曼陀羅 妙香及衣服 奉上供釋仙  
非飲食及寶 能報父母恩 引導向正法  
便為供二親 供二足尊已 發淨上道心  
我長夜常勤 常數數時勤 其母生喜心  
畢竟不生恥 往詣人仙所 禮已在前往  
華散如來上 奉華及衣服 佛所種善根  
即發菩提心 堅住菩提心 問於釋師子  
懷妊淨眾生 願說是福報 汝以此善業  
不生諸難趣 供多億佛已 當得成為佛

爾時世尊於舍衛大城次第乞食已。與不思議光菩薩及諸大眾出王舍大城。向祇陀林給孤窮精舍。世尊食已。淨自澡嗽。而起就座。演說正法。爾時憍薩羅國波斯匿王。聞不思議光菩薩嬰兒。有大不可思議神通。聞已莊嚴四種兵眾。向祇陀林給孤窮精舍。詣世尊所。到已頂禮佛足。却坐一面。波斯匿王白世尊言。大德世尊。不思議光菩薩嬰兒。為在何處。聞有如是不可思議神通之力。時佛即示波斯匿王。不思議光菩薩嬰兒。時王見是不思議光菩薩嬰兒。形色端嚴殊特。於天無所畏懼。具戒定慧。以自莊嚴。如是見已。便作是念。種何善根。修集何福。有是妙身。爾時不思議光嬰兒承佛神力。知憍薩羅國王心之所念。向是大王而說偈言

無麤穢惡修正念 攝身口意淨梵行  
彼有如是淨妙身 遠離惡者不自造  
增長修集無量善 捨離一切惡諍訟  
彼有如是淨妙身 恭敬佛法及聖僧  
常恒奉施眾妙供 不毀罵他不逼惱

彼有如是淨妙身 調弄呵罵及毀皆  
於他人所不生是 歎美讚善不說惡  
彼有如是淨妙身 慳貪嫉妬及憍慢  
諦觀已行不毀他 彼有如是淨妙身

爾時波斯匿王白世尊言。是不思議光菩薩嬰兒。成就如是勝妙大法。有何業障。而生於九十一劫。爾時有佛號毘婆尸。出現於世。如來應供正遍覺。明行足善逝世間解。無上士調御丈夫。天人師佛世尊。大王當知。爾時毘婆尸如來法中。有二菩薩。一名賢天。二名饒財。賢天菩薩於無上道。得不退轉。得陀羅尼。及無礙辯。獲無生忍。有福德威勢。少欲少事。常樂獨處。逮得神通。彼時饒財菩薩。習學頭陀。為賢天菩薩而作給使。彼人恒往聚落城邑。多諸事務。是賢天菩薩呵嘖教誨。何故多造是諸事務。而不斷除。數數教呵。彼便生瞋忿心。不喜。以忿恚故。毀敗身心。敗身心已。瞋恚罵言。輕賤姪女兒私通所生。從他人得。不識其父。又不識母。況汝當有戒聞定慧。彼瞋罵已。復不悔過。又不捨離。結使所纏。恒有忿心。瞋賢天菩薩。時賢天菩薩即便捨棄。既捨棄已。倍生瞋恚。罵詈揚惡。以此不善業行。因緣。身壞命終。生姪女胎。為彼賢天菩薩所護。不生地獄。姪女生已。恒常棄之。為狐狼狗之所噉食。大王。以是緣故。九十一劫。常如是死。生空處。狐狼狗食。大王莫疑。何以故。彼時饒財瞋罵菩薩。即是今此。不思議光菩薩是也。惡